

景
文
集
九









景
文
集
九

宋
祁
撰



中
華
書
局



景文集卷五十二

啓

賀之相公啓

伏審光奉制麻。榮持武節。伏惟慶慰。恭以閣下識諸民極。氣函天倪。舊謀自將。與聖胥會。煩使已試。素論僉宜。遂階三事之聯。造穆萬樞之總。巨壘朝開。內車夕馳。一旗麾衆。以暫登。寸廩嬰賊。而還獻。迎頒茂冊。卽正家司。贊宗祀之上儀。揭竝侑之新典。百度底定。九德敷施。爰賴獨賢。再休近輔。朝謀元帥。帝念宗工。祗築齋壇。顯受師鉞。臨遣前席。大撫西人。漢家之注意安危。竝師舊德。吉甫之兼資文武。庸式萬邦。詎淹零雨之還。屹復泰階之冠。祔方勤障候。阻飭車轡。瞻湖門墉。飛馳鈴府。

賀相公啓

伏審光奉制函。改疏藩社。伏惟慶慰。恭以閣下沈謀隱正。惇德粹明。感會先朝。協恭順采。萬樞俾乂。露金石之至誠。三雷危言。摧豺狼之餓喙。背憎迭逞。身退罔私。會正寧之執彊。判羣邪而圖舊。子文三已。曾喜慍之不形。姬旦未歸。固室家之同望。游更巨屏。均暢遠猷。茲者北海表封。東秦均重。再煩坐鎮之德。克宣決大之風。然而人鬱具瞻。邦思弼直。天將爲鐸。竢適舌之至音。政若和羹。竚薇梅之妙味。詎屈昔年之報。

卽迎三節之趨。大庇含生。永孚久業。

賀集賢李相公啓

伏審肅奉制恩。對司魁柄。伏惟慶慰。恭以集賢相公。慮經萬事。業映九功。曩自先朝。已膺茂宰。去邦不校。則靜若淵淳。會聖有期。則毅然山立。運有夷險。道無滯磷。屬明辟之敷求。眷舊人而圖任。越由藩枳。再序公槐。伏以東山見思。歎還歸之甚晚。南宮所著。留故事以居多。方抃登賢。遽收崇讓。矧佐王之爲重。匪收汗之可期。願體清衷。速膺殊典。載披題誨。但伏眷私。

賀史館相公啓

一作賀富相公啓

伏觀今月十六日麻制。伏審昭備冊恩。入正台府。伏惟慶慰。恭以閣下業總民極。氣陶天倪。自大對清規。安步華掖。詞析醜類。德庇生人。復故約于撫和。屈隹兵于不戰。進幹樞綽。出均賢勞。謀當帝心。功暴方夏。遂膺帝賚之素。入光公孫之求。對執萬機。顯正三事。槐朝表位。慶賢聖之同時。鼎足承君。併安危之注意。至公在位。有識均歡。祁早誤知憐。欽聞命數。乘北障之守。詎敢彈冠。溯西閣之深。情難飛羽。第均紳笏。參仰坯陶。

賀并州安撫相公啓

伏審寵被墨麻。移鎮藩牧。伏惟慶慰。恭以經略安撫相公。神贊忠傑。天恭謀謨。坐清叛戎。大造西鄙。進茂

帝緯昭穆。肇倫。遂均三事之勞。蒙總中軍之令。堯曰四嶽。實統諸侯。周制上公。亦居二伯。中外雖異。倚注弗殊。但虞桑蔭之淹。復冠槐階之貴。士類攸仰。天下同瞻。祗尙守邊符。莫陪賓贊。心傾德宇。恨不翰飛。

賀文相公啓

伏祝去月十一日。內降白麻。伏審勳奉制恩。式序元宰。伏惟慶慰。恭以閣下忠實天挺。器本國資。蓄爲嘉猷。邁作昭德。自禽繁妖盜。綏靜黎元。講希世之洪儀。浹函區之大霈。協風八律。人有太和。赫日當天。物無斜影。旋委魁柄。外倡方侯。其如簡在之眷。素隆。是以還相之期。難久。誕告剛旦。復冠乾台。冊賜焜煌。書贊優重。弼惟帝賚。宜體貌之愈加。公自西來。固室家之相賀。永光不綽。遂格上穹。祗加以餽辱。誤蒙獎錄。遠滯屯鄙。側聽寢音。慶坏冶之在辰。阻巾幘而詣府。欣忙之切。精縕奚宣。

賀南京劉相公啓

伏審懇辭宰柄。出守留都。確請不回。俞音俄降。伏惟慶慰。恭以大觀文相公。照通三極。業茂九歌。咸會帝期。彌綸王體。隱含章而內健。藹造辟以進思。七年于今。百度咸乂。功名之地不處。亟露奏封。進退之正有宜。遂申高節。增冬宮之茂秩。帖雲殿之祕資。用付南畿。益衍多戶。宗臣舊法。固自著于廟堂。仁人乃心。亶不離于王室。鎮息浮動。均一賢勞。祗適剖州符。阻通慶謁。欽懷風矩。參激衿膺。

賀柴相公啓

伏審肅膺明制。改霽近藩。伏惟慶慰。恭以閣下茂德參和。大猷經遠。世嗣廟壝之伐。入連王館之榮。節制中權。耳耳華于六轡。綢繆上袞。煌煌視于三階。執競又新。疇勞彌渥。眷言旬服。移建侯邦。推異數于爰田。實衍封于家稍。僉言既允。誕告咸聞。何確懇以辭隆。尙留恩而引日。特貽鈞翰。過列謙情。矧卽寵光。方紆勤企。

賀廣信軍武六宅啓

伏審寵正使名。茂光戎轄。守符未改。邊鎖增雄。足下英標自高。沈謀克際。敵上所懷。器勇于餘。積閭有歲。月之流。薦賢交章。奏之密果。從聖簡。進服恩。列帥慰以相歡。中軍倚而增重。攝符無狀。卽席是資。竊抃餘音。回符久禱。

賀李宣徽生日啓

伏以天賚良弼。國仰宗臣。茂協高秋。共欣慶日。恭以臺下資稟忠厚。謀濟沉雄。宜力百爲。同寅一德。生毓在旦。峻極有基。重望元功。久當一面之委。長年雅壽。宜歸千歲之延。卓冠朝塗。永光王府。祁官難離。次地卽富隣。躬詣莫諧。禱祈增萬。

謝生日餽物啓

叨塵從籍。倫比儒紳。私記所生。內惟永感。而台造垂記。慶問下馳。牢牽在庭。薰劑凝器。副之仙繪。申以齋

膠惟山水之不才。況樸樸之且老。仰蒙善視。俾永天年。願依聖鑒之餘。更無疴殘之氣。丹膺內刻。訥語難宣。

上王尙書啓

祁八月末到都。臥家養疾。得不事事。故羸瘠欣欣有生意。但神疲氣耗。未任趨走。日不遑舍。上恩如天。可勝道哉。不審比來。明公百況何似。知深究導養術。塵緣日輕。此僕晚聞道之罪。不得望公藩牆矣。然冀遂進之毋怠。于九德三事。亦何所妨嫌云。

上資政尙書啓

祁惶恐。奏記資政尙書執事。葉拱之隔。歲實載華。乃情屬湖。與日參極。郊圻胥接。風謠亟聞。恭承鎮撫餘閒。福祚崇衍。光零微管。調度少勤。雖京控制。事務彌劇。伏望慎固沖守。綏協善經。徐副民瞻。還步台輔。既履傷物。他人無真。縷縷懇懇。知所歸庇。不任禱戀之至。不宣。

回青州夏尙書啓

屬者國家以表海仍饑。生緣爲療。鬱其嘉氣。瘼此下民。上深軫于何辜。我實難于共此。得于舊輔。殿是大邦。恭惟尙書道茂協恭。眷深同體。細文卽授。便道按行。包季蒞之全區。將仲山之明命。詔書一切。許于便宜。漕舫相銜。資于仰給。永惟賦政。備覲有猷。闔租計之會期。濟流庸之沒振。汙萊故壤。過及于屢豐。愁嘆

餘音坐成于式舞。不啓後艱之隙。允鑒坐鎮之方。積簡帝心。功暴民聽。朝無異論。賞有舊章。遡沐書文。備形謙意。九重歸美。已欽長者之言。四近疇庸。寧後富民之拜。感慙所萃。敷釋匪殛。

回晏尙書到任啓

伏白尙書暫辭機軸。近撫藩垣。揭天節以載華。總齋航而右泝。使時叶吉。樹政有經。恭惟天一奧區。鬱華勝里。文壇藉闕。經順拜于宸游。封屋連雲。有望電之故老。式倚神明之化。往敦愷悌之風。何辱謙儀。特貽音思。篤膏僚之曩誼。露存闕之深情。況切營求。諒非遠復。冀綿綿而存用。副赫赫之攸瞻。披晤尙遙。編摩非述。

賀三司韓尙書啓

伏審光奉制恩。入司邦計。伏惟慶慰。恭以尙書稟天正氣。宵道太和。親逢帝期。進輔皇載。畜自一德。奮爲九功。自引避于機衡。又回倡于方岳。經費之重。咳入實繁。屈安石東山之高。領張蒼北平之總。納節王府。換秩天臺。聊豐寶路之財。行復符階之貴。參質于衆。誰不其然。祁夙荷誤知。側聞騰告。欣頌并集。慶候難階。

回諸官爲轉尙書承旨啓

向者。以偕衆成書。擢升左轄。滿年循例。進齒中臺。緣內署之乏員。枉複門之召節。多病在告。懇讓未俞。靜

言衰晏之餘。曷稱凝嚴之拜。此蓋閣下素加優品。仍旣雅游。因成命之已行。借褻言而爲地。敢忘悉力。仰答重知。

回夏尙書南京上任啓

伏承榮顯。肅開上府。道風所被。禮俗載康。恭惟尙書識照聖鄰。謀含國采。早同寅于成務。游凝績以蕃君。比漢鄼侯。謹信而司籥。爲周申伯。惠直以揉邦。屬信處之云初。顧化成而允賴。猥紆公翰。申賁禮華。永惟萬戶之嚴。聊浹九河之潤。冀適天祉。翹奉帝咨。佩玦欣綸。一二非述。

回宋尙書啓

比者。伏以尙書輟務樞庭。回光台極。聖期脩選。賢業載熙。罄牢讓以亟聞。留茂恩而羌久。寵紆優答。姑廢雅懷。人對丹塗之嚴。進踐槐階之亞。周言交錫。有疇于告猷。天下居安。更隆于注意。方欣附末。遽辱詒音。銜謙德以斯勞。幸宗盟之永庇。茲焉感躍。實倍偷夷。

又回宋尙書啓

伏審光膺詔綽。參總政機。伏惟慶慰。恭以尙書學際三儀。謀經九德。若時佐聖。讓格喬庸。自命節以歸趨。翊帝樞之宥密。終緣民望。還武台司。超進七兵之曹。增重三槐之路。俞咨素定。朝野相歡。承尙讓以自陳。頗留恩而引避。并垂綽誨。式履終謙。況敦詔以尋頒。幸雅懷之無固。傾軛對寵。併釋翹誠。

上青州夏尚書啓

伏自尚書上還樞筦。近抗藩麾。順泝長波。鎮臨善部。方欲託飛郵而奏記。私執事以布懷。旋審朱轡。改疏青社。以時便道。靡遑客寢之安。所至宣風。用示簡書之急。頓遙師坐。終曠單函。恭惟視事云初。嚮福咸乂。歌齊之壤。表海成邦。比歲洊饑。斯人失職。蚩蚩土著。寢苦庸亡。淪淪頌聲。鞠爲愁嘆。容明垂軫。中昃栽懷。咨蕭育之名臣。振爽鳩之故俗。報同五月之速。落去細苛。事從一切之宜。仰成咻噢。荒餘攸庇。仁壽可期。我實徂東。諒結姬公之愛。上方倚相。行膺壺遂之求。願保天均。俯對民譽。眷孤生于銜遇。列勤悃以兼常。

上陳州晏尚書啓

伏審祇奉朝命。取升台坐。伏惟慶慰。惟知府尚書文經天極。照洞民彝。入對光華之辰。亟揚久大之業。微言茂藻。貴堯思之安安。嘉話遠猷。贊皋謨之采采。退安吉履。迭守近封。冥物眇之虧成。放道樞之曼衍。冲機潛應。休問自升。逮景風之賞期。進白雲之官紀。露陳賜冕。聊夸六枳之藩。馳執親圭。行正三槐之位。民瞻久竦。帝賚有聞。祁欽聽除音。叢歡勞府。屬攸箴之有守。邇申慶以難階。傾抃所深。名言非狀。

上許州張相公陳州晏尚書啓

近聽恩制。序進卿聯。列讓靡還。冒榮增愧。伏念某本緣天幸。忝參國均。會聰容之日躋。乏謀猷而譽處。有忤竊祿。不穡餘閑。未登攷歲之期。遽濫賞風之典。外譁鄉議。仰累朝猷。敢謂閣下錫以公言。與其禮進。綢

書郵之慶問。分台舍之餘輝。願佩優評。庶亡祇悔。丹愚草感。擯翰匪宣。

回賀加尙書啓

嚮以成書。冒榮左轄。茲繇滿歲。進秩中臺。寵過者災必相尋。食浮者人將不稱。惕然自愧。罔或遑寧。敢圖評且之優。助協朝僉之允。華裒已定。危懼差安。遂繫金石之交。更決桑榆之勝。瞻言厚德。載戢丹衷。

東莞州侍講尙書啓

伏審光奉制恩。進升寵級。伏惟慶慰。恭以尙書業宣寅亮。體叶允元。服榮牒于三朝。逮華顛而一節。上方向學。延雋老以詳求。緒欲鎮浮。據中庸而易退。出麾東社。紆眷南閣。茲者國家抑畏先猷。振除後咎。辰居勿亟。渙號惟新。眷舊德以同寅。舉徽章而異等。心存王室。重申伯之于藩。禮蔚帝師。邁甘盤之罔顯。絲繡遂布。紳綏相趨。祁風被慈憐。均聆渥綬。湖隴門而且右。躍螽股以忘疲。卑情無任欣抃之至。

謝留府尙書啓

待罪禁垣。曄風幕府。六符在望。三歲其陰。距容舸之流。坐驚宋遠。遡飛鴻之渚。久疇公歸。結深戀于華軒。耿離悵于疏席。敢謂留府尙書。乘假蒞之暇。紆紙筆之精。敷勵善辭。勤經至意。餘光所照。頓忘家節之咨。舊物載懷。竊附吾甦之托。題襟佩教。撫已知歸。九旻之宇。寢高千門之鑰。惟謹。願安頤齋。仰重眷毗。俟四輔之營求。庇一陶之埏鑄。乃情爲僊。緩頰匪宜。

代鄭公回夏尙書啓

茲者祇荷朝綸。賜停機柄。進肅天台之務。仍參規廷之華。曠職五期。蒙恩一解。榮非所望。愧不容顏。敢謂尙書敦操有筠。推情悅柏。絢書辭而垂慶。助師錫以申褒。冀訂良箴。益紓多悔。接緒風而猶邈。敷感抱以奚殫。

上判府尙書啓

伏審表海報成。坐躋樂國。中圻分理。進守留京。幕府旣開。彼都何幸。恭惟尙書明謨熙綽。浚德惇元。淳幹機樞。彌忠力而自效。均國勞任。與師濟以和衷。靈龜在中。喻馬忘累。雖復勉班春而振乏。大庇物于屢豐。出乃緒餘。同人憂樂。賞岡尤異。聊襲冕以露華。地直鬱葱。果錫圭而委重。惟泰宇之先定。非外物之屢遷。今茲偃蕃。是均倚相。宣尼之懷吾黨。尙念斐成。周人之詠我公。固應信處。願孚百順。俯協四時。決河福以并蒙。迺鑾聲之歸止。早塵評眷。今宿官司。撫舊集猷。倍百慕等。

賀樞密侍郎生日啓

伏以積善所憑。愛啓莫京之冑。元精發粹。用生名世之賢。紀六矢之初辰。續百金之雅壽。恭惟侍郎選言復貫。惇德浚明。包民極以佐王。又天樞而圖國。哉生流慶。方賴于壯猷。延祝佑歡。輒修于薄貲。庶宣勤懇。具列別封。

上蔡副樞生日啓

高嶽極天。本慶基而憑厚。右賢名世。屬聖旦以挺生。歷載誕之嘉特。仰有猷一偶輔。竝均善禱。式美如仁。恭惟閣下。惠迪人彝。參和國締。翊聲明于義嬪。濟文軫于蒙中。約矢射方。遂符于夙志。累茵稱壽。更慶于慈顏。願滋苞竹之榮。寢啓和梅之業。輒茲菲贊。聊侑歡悰。已具別幅啓聞。

上李都尉王都尉啓

伏審肅奉明恩。改書近社。伏惟慶慰。都尉機靈敏裕。履尚詳華。貫九類而有猷。服千齡而逢聖。聯姻沁館。焜照于天潢。接寵韓壇。總提于師節。乃神在宥。進律推榮。清明之朝。聿伸于誕告。蕃宣之寵。渙易于師封。允協羣言。猶煩確讓。願時膺夫茂典。用增煥于中權。過沐公涵。但銜謙德。

賀安撫龍圖啓

伏審進膺禁城。出撫价藩。終安列邦。總護諸將。吉音騰驛。公議同咨。恭惟安撫國器閎通。辰猷幅臆。雖全盛德。自結上知。向屬河朔無年。縣官勤餉。遴擇髦舉。經制賦財。振匱爲豐。化愁而忭。萬倉之粟知斂。八府之錢不流。擢參從車。用待明制。不績益奮。華寵亟臻。果因踣地之趨。入直河圖之祕。遂傳一面。分控北邊。雲屯百成。已豫歡于美教。縵胡萬旅。方傾聽于先庚。第資郤縠之中軍。階嗣平當之茂宰。祁早聯朋。蓂今託隣光。仰波之餘。執柯不遠。載惟欣假。何喻端倪。

賀宋安撫啓

上閣祕嚴。北邊控撫。竝華使領。允協朝僉。安撫才勇挺資。機鈴濟美。擢財少府。尙籠羣貨之貿遷。持節朔
陲。盡得藩渠之要領。入敷課目。啓沃宸聰。果延郁穆之襲。遂副綏安之重。況緣雅契。尤慰私悰。方安步于
亭衡。枉移文于書舍。謙勤可復。欣感相并。

賀宮師杜相公啓

伏審茂膺明制。進冠崇聯。伏惟慶慰。恭以閣下天挺方嚴。道卑沖厚。早服休運。晚躋柄司。種厥德以惇明。
蕩他腸之懊惡。功在鐘鼎。言留典謨。所以奮堂上之奇忠。忠宜盡瘁。然後謝人間之務。誼不苟貪。有識凝咨。
當陽欽美。雖几杖自便。而典冊再光。悉俸于官。卽家爲府。帥臣之位一品。弗辜愈榮。君子之壽萬年。在開
彌佚。賢哲相望。今古幾何。祁夙預洪鈞。側聆異數。顧邊符之有守。溯林廡以方遠。滋喜所并。臨文笑喻。

上省副張中庸啓

被教以老夫久疾。特賜存慰。何感如之。僕苦寒瘡。幾三旬不能止。今惟耆皮裹衰骨。以疲神耗氣守之。但
未及死耳。比來似小勝。然未得平甌。手足酸重。令諸兒相扶持。方得履地。恐因此遂不能爲完人。天以此
俾僕早還丘園耳。凡藥補之。過暖則躁而遽。近溫則紆而不切。單劑毒品。又不敢徼幸。此最難爲調適。是
以淹臥至此。應數奇致然。來問丁寧。故一二具至。省局事約。吏詳甚善。順時愛攝。

賀大名王相公啓

伏審茂膺恩冊。進拜齋壇。伏惟慶慰。恭以閣下上袞宗工。華顯舊德。歷相二后。交穆萬樞。嚴假安安。簡上心而有素。羣言謬謬。滿天下而罔私。久假藩維。頗均賢逸。而北門須屏。中宸慎時。猥紆茂宰之僉。回領元戎之制。疏榮曹社。坐鎮魏臺。抗大旆之悠悠。肅使驂之耳耳。晉卿作帥。竝推郤縠之賢。漢相臨屯。益竦韓之畏。永言作翰。式疇銘勳。祁早庇洪鈞。欽聆渥典。阻紹材之仲慶。望驅轡以馳魂。歡緒愧悰。參升無喻。

上龐相公啓

伏審亟露需章。上還宰柄。義當均逸。恩許假藩。羣望悵然。有道欽止。恭惟閣下才爲世挺。運與聖偕。嚮鈇西戎。入陪右府。翊戴丕后。勤勞王家。遂回樞省之嚴。聿冠乾台之貴。南洗蠻霧。近盪隴氛。太羹和而既平。九鼎隱焉增重。茂勳方顯。勇退自高。或罪或知。固顯仲尼之道大。何喜何慍。益知令尹之德全。聊倡方侯。行歸冢席。祁早依誕治。今屬扞城。待材閣以未辰。吮禿毫而無緒。企戀之極。一二奚宣。

景文集卷五十三

啓

上許州太師相公啓

伏以黃圖近輔。陪壤天居。層極貴台。冠儀侯服。沛河靈而并潤。歸鼎重以參和。百順具臻。庶工肯慰。恭惟太師相公。業宣暇假。慮入幾神。副師尹于民瞻。本孝侯之天賜。凝華協帝。實相清明之初。敷哲保身。不處功名之地。亟均賢事。暫殿翰蕃。冥物畛以外齊。據道環而中應。然而商家舊學。素有待于甘盤。漢幄宗臣。難從游于松子。諒須旦暮。再秉機衡。奔騎履之緒餘。倚歲霖以休澤。縷縷所祝。吶吶匪宣。

上西京留府太師相公啓

伏審改持命節。移總留都。伏惟歡慶。恭以閣下道冠民彝。業熙帝緯。武以摧元惡之漸。文以佐大化之成。暫均夙勞。益儲鉅望。上心攸眷。褒冊俄頒。輟西洛之保釐。委北門之鎮撫。介圭卓馬。方修覲于帝闈。九鼎長城。已懽威于敵國。不待期月。諒促召裝。且還冠于霄階。用永安于廟社。衰殘無狀。延播焉依。

賀大名太師王相公啓

伏審茂膺制命。兼踐宰司。伏惟慶慰。恭以太師相公。感會二儀。惇崇九德。躬負日月。以啓于大明。神合蓍

龜用經于庶務。均勞朝夕之誨。出藩海岱之區。卓爾讓夷。退然蹈道。改疏北社。握節元戎。鬱巖石之具瞻。儼渚鴻之無所。果頒帝告。卽序乾台。當一面以于蕃。許二公而居外。式是列辟。模我華倫。竑大庇于如仁。復坐論于此道。顧茲命數。式應官占。祁夙被誕陶。欽聞渥綬。宿官司畏。謁府無從。

上太師相公啓

伏審太師相公進升台席。伏惟慶慰。恭以太師相公道包庶貳。識貫幾初。魚蒸汕以丁辰。鳳覽輝而奮業。尹躬一德。早契于先猷。舜政重華。載言于萬事。茂迪無窮之烈。亟遵易退之方。假節東齊。詠均零雨。建牙全魏。隱若長城。聳民望而未移。果天私之改需。惟師視秩適冠于友邦。論道一榮更聯于公枳。協官占而誕告。藹師錫以僉同。而況天意佑民。帝心圖舊。漢官百度。素稟蕭規。周室二南。聊分邵右。竑嘖鑾之肆覲。增敬鼎之圖安。祁早服慈憐。欽聞渙命。旅賓籜而尙邈。抃心極以惟勤。

回外任賀諫議啓

嚮以備位經筵。沾恩宸綵。猥由末至。例合叙升。促大比之常規。玷邇言之清列。寵方躡等。得無糠粃之羞。祿已浮人。更重鶉貍之謂。方慙冒竊。遽枉緘滕。味襄飾之過情。第持循之式倣。永惟衡戢。罔旣名言。

回并代陪署孟都使啓

伏審序升近職。移佐中軍。成命有光。羣言告允。恭惟執事沈謀先事。美閎映時。外提雲壘之雄。內董星藩。

之祕果疇見效。益峻榮階。愜全魏之訓師。奄太原而經武。殊鄰歛衽。均萬里之干城。諸校趨風。重九天之下將。適欽褒進。遽枉緘騰。載欽悅禮之賢。第積裝懷之感。晤陪云遠。企詠奚殫。

上鎮府部署王都使啓

承已視事。伏用欣慶。都使以世烈之顯。復才爲上知。環衛親近。出貳師府。方建高牙。以付一面。惟保納沖和。以究遠猷。鄰路翹企。不宣。

同王都署都使啓

伏審光奉命書。進膺劇職。值才而受。有識肯歡。恭惟執事器尙沈雄。忠猷幅臆。周通軍志。善得士心。自提親旅之嚴。兼護邊陲之重。威憚獯帳。功著王旂。遂因蘭錡之虛階。亟亞星藩之邇衛。中營倚重。式光鼙鼓之求。敵國聞風。更聳金湯之畏。方欣華渚。俄枉謙言。疊敷沖讓之懷。周結親鄰之好。仰欽德範。足採邦彝。慶愧所并。衿紳交篆。

回孫閣使謝官啓

比者執事以屏翰之勞。厚顯印之眷。惠孚善俗。威憚殊鄰。隱然萬里之防。當茲一面之寄。采謠來上。成命聿頒。升華閣之使儀。下掖垣之咨命。屬茲邇直。猥獲代言。宜允顯之猷。罔周茂伐。迫稽留之禁。殊乏善詞。詆鉛筆以僅成。付綈囊而慎出。敢圖謙槩。遽枉書滕。布款密于言樞。屈雄嚴于義府。仍將珍幣。以約書儀。

公子所言。況奉惟幾之戒。私其受貶。寧逃厭取之差。輒廢讓憎。欽承厚意。鏤丹愚而積感。非啞口以殫論。謝及第啓

雪挾傳趨。竝集規庭之祕。芝蘭誕告。茂傾綸采之榮。獲預言揚。舉增夕惕。竊以周家共賢者之樂。式訂思皇之篇。唐室獲彀中之雄。大署前鄉之號。皆以竊求側陋。曾籲峻良。拔十之取至精。羣百之廉競爽。粉澤賢業。于以揚同文之規。策策帝謨。于以贊不天之律。卓爲能事。屬我泰辰。國家援史契以右文。憲奎鈞而按牒。歷選奧訓。庸見大猷。煥乎堯章。蔚垂光于四表。炳然漢德。森奏御于千篇。肅羽嬉翔。珍羣簞集。遺宅丕之承烈。咨故訓以垂精。象大璧之離流。典容寢講。厲砥石而磨鈍。爵馭載靡。細文下乎方州。吉士旅于庭物。崇簡臣鄰之重。傾司秀選之求。睿式震嚴。廟謨敷盡。文每奏而稱善。中覆用加。士三適而有功。新書彌謹。厦材萃止。官棧翹然。諒匪學踐聖優。職窮言貫。膝倚桑林之舞。神欲沛游。未至睢陽之園。妍辭擢賢。則何以仰膺勸駕。祇奉式言。預棘籬之第名。備囊帷之乙覽。賈咨國彥。始協人言。如祁者。數本雋奇。才無肖似。謬參靈最。猥席慶餘。失南畝之轉綠。濫中陵之樂育。呻吟之畢。罕邁于師嚴。戕屈之杯。自驚其性失。徒以早紉晏稷之訓。久諱東家之窮。英游誦其節疏。連蹇甘乎頭責。量愁多萬斛之苦。積疹豈一丸之銷。奔走煨塵。支離皮骨。間屬外僑鄉梓。求錢歌萃。州司敦遣以臨門。縣次偕來而續食。利見中天之闕。獨校尙書之闕。儼佩紛而竝趨。幾閣筆而不下。根柢之容素乏。敢冀目成。神明之觀坐迷。頗虞氣耗。勉從叩寂。

內愧他先所宜謹顏氏之舍藏。先子雲之觸能。竝逃九罟。無預于盈虛。亟聘百鉤。前髮乎撓謁。寧期黔淺。誤及甄收。採噴留于折揚。露賸委于仁壽。越陪下綴。祇造清廂。錦几橫霞。親呈其署議。楓宸燭日。譚望于顯印。仰清問之載俞。遵哲科而中選。若若之綬。蕃錫以光軀。灝灝之言。舉行而申儆。走牆笑讓。渙汗莫收。簪批在前。顧公非而可畏。履狶愈下。荷至鑒之不遺。矧夫墳伯之榮。冠乃王髦之列。聯跼並秀。懷組相趨。佩華寵之咨臻。撫優躬而內省。愧流浹背。情感裝懷。斯蓋伏遇閣下。協比國猷。若時天綽。庶縵雲而啓旦。責倬漢以垂章。並刈眾材。居無棄物。絳鳧斷鵠。必盡生之短長。誠衡捶鉤。不爲人而輕重。日智拯其將墜。采菲俾于兼資。枯木無容。罔吝犧樽之飾。豕荅爲主。備收藥錄之珍。荷更品以于茲。撫孤生而奚報。謹當稽參官式。勤緝政綱。疏淪乃心。服朝家之成憲。備僊從事。講肉食之遠謀。仰酬如卵之私。俯厲析肝之誓。過茲已往。未知所圖。

賀三司內翰直學士啟

伏審光奉制恩。進司邦計。伏惟慶慰。恭以三司內翰學士。負顏閔之摯。遵陶姚之隆。內發懿文。昭貴皇極。更踐詞禁。同清憲臺。基命省中之嚴。閱滿天下之事。迭總藩要。歸上治成。卓哉帝簡于衷。浩然物飽其論。故抑柄用。以熟民瞻。聊司咳入之繁。式興長利之美。叶文學大夫之義。足司農少府之淵。績用有光。政將焉往。願少安于寵次。方徐炳于台符。早接盍簪。今乘絕塞。欽詔緒之引拜。撫宮綬以知榮。展慶莫從。循衿

增抃。

回延州通判太博啟

伏承足下以府奏論才臺恩賜第寵光朝路聲震文林每爲卓越之才早屈藩宣之佐雄邊轉粟屢濟師期削牘論兵頻經帝覽讓夷弗處實力載虔果旌出類之能不待程文之召擢升俊目對易容司諒嘉會之有開縱翰飛而叵測敢期謙損遠記衰殘因逢聖以極言及提衡之餘論中研麗采已慙揚枇之先欽祝華階早服持荷之從茲爲欣嘆拙布名言

代回刁太博啟

比者賜罷宰聯寵分州寄式揚舲而倍道方推策以赴官竊承倖事之僚亦遲交符之禮敢期謙損先諭誨辭矧恩榜之舊榮復朋方之雅契遽茲肯遇誠絕常均幸促使裝早光郡閣披承孔邇庇賴居多感戴欣翹一二非述

代鄭公回徐州啟

伏審顯膺恩制進拜東卿伏惟慶慰恭以相公道燭民彝識經王體感風雲之會光輔兩朝勵金石之心惇崇九德協時中而易退藹醴假以無言下武繼明維藩注意隱長城而爲重增定鼎于旣安昨以茲祀落成祈年肆育首圖舊德備厚徽章茂遷喉舌之司申獎股肱之寄蕭規故在矧三府以奉行軒輔還歸

竝六符之增煥。恭聞師錫。載穆民瞻。且以某忝佐國鈞。敘升天轄。猥煩台念。先損書辭。弗忘道悅之懷。并露恩勤之意。永言愧荷。叢篆升恩。

梅侍讀問候啟

伏以謏輔龐康。任先作屏。路門紉繹。眷切均賢。仰舊學之敦修。謹寬條而靜布。民謠叢美。天貺臻和。沛河海以蒙霑。慰纓綏之胥企。清和協序。殫納攸宜。慨巾幆陪晤之餘。顧研削寓辭之訥。第深靳嚮。曷喻悰靈。

柳侍讀啟

伏自侍讀暫違交戟。三擁守符。雖臥閤以臻和。每側身而懷想。恭惟淮壖奧府。楚望劇藩。多寄重于邇臣。賴宣風而樂職。化漸褊袴。已欽來暮之歌。潤浹河流。更飫帡幪之福。竝伊朝夕。入總機衡。瞻頌所兼。一二焉究。

王侍讀啟

二日次左綿。枉鑒人肅給。嗣餉醪筍。皆濟所乏。感愧無喻。但去人滋遠。思人滋深。奈何。陟頓雖勤。幸無雨淖。若過二劍。則無阻矣。所過來牟大稔。民屋熙熙。西南信樂國也。今日是學射出遊。想千騎彷徨于鮮原。把酒勞客。觀者牆堵。并四者之樂。不亦盛哉。不得一接後乘。歆豔可知。山阪日多。乘百步馬從兵行役。殊未有涯。惟冀善護玉體。

賈都官啟

右某啓。伏念祁脫籍民座。濫巾史局。頃緣多難。自分數奇。今屬長年。未能藏疾。乘天之幸。所食遂浮。誤市駿之旁求。結載驥之深愧。逖懷茂彥。素厚慈憐。本推輓以及茲。戢題評而有在。邊煩惠問。遐記曩遊。露直操以松寒。布深辭而烏永。于囊是祕。匪石能銘。撫歲物以維祺。睇明簪而甚遠。願遵冲齋。歸踐亨嘉。企嚮緒風。飛馳遐悃。

回邠州夏館使啓

伏念逖遠候表。恍及歲陰。惟使榮之雄邊。隔私書之馳舍。永言瞻懷。第結冲憂。敢謂執事閔務中軍。留情尺牘。因談賓之還調。顧儒館以通音。占吏敷辭。彌驗雅歌之適。降階約禮。居欽義府之敦。申復至情。昭銘中牘。物華腴晏。戎索靖和。善介蕃祺。茂宣來譽。

回知郡啟

不侍君子。悅已踰年。間緣多病。養成鴛情。闕奉訊記。參承寢興。惘然西湖。戀慙並結。敢謂雅容。申尋曩懷。親占書辭。疾走郵舍。啟緘長跪。如聆面命。非寄通遺迹。時及于茲。君侯遠守郡條。靜勝天韻。戢翰跼武。久而未伸。而孱鰥後生。充備臺省。宜爲校議之喧咋也。惟寬中泰定。益保耆範。俾吾黨知所裁焉。虔係虔係。回知郡主客啟。

伏自執事嚮膺詔檢，卽領郡麾，承便道以揚舲，尋署文而坐府，聞風守邛，紆想搖旌，俗慮所叢，郵音未致，敢謂曲敦謙樸，追紀管僚，時因計吏之西，先損書牋之問，辭情並緝，固千里而不達，毫墨相鮮，實一臺而均妙，惕焉珍詠，終以銘藏，矧惟傾艾之姿，久累淹回之嘆，願綏介福，行丐悼言，德宇所瞻，心微曷序。

上知郡國博啟

伏承齋航使道，使閣班條，游煩記室之音，垂曉通問之舊，備聆順福，允集素襟，知郡國博風局精強，材謀明劭，歷更煩使，休有令聲，對薦交于露封，眷求簡于中宸，永言劇部，比遴薦瘞，疇咨吏師，撫我民瘼，諒以暮年賦政，追西漢之惟良，五袴騰謳，與南風而同競，顯躋治等，歸服近僚，願保粹真，下符傾嚮，凋年行晚，清昭末期，服義素深，操觚非敘。

上九江知郡都官啟

服采中臺，遡風南溟，聞薰衣之聯舍，耿搖旆之離懷，聞者敢謂都官曲記雅游，嗣傳芳訊，選言實至，敦操彌堅，佩嘉惠之甚勤，審冲禧之有裕，矧二千石之重，力倚吏師，什一頌之興，載流民詠，欽聆最狀，益厚宸褒，趨接末期，瞻凝何敘。

與知郡啓

久假民廩，近還朝綬，迷魂乍復，常禮罕修，惟引籍之故人，方假鑒于善郡，瞻言友會，實耿離悵，頃留邸之

傳音承剖符而易地。載揚善化。以福編民。諒謠頌之洽聞。固寵靈而咨委。歲將窮紀。人歎離羣。益慎生經。少紓心嚮。

錢大監啟

伏承執事懇露沖懷。上還所事。循道家之知止。協禮典之引年。名登士林。眷回宸極。聿奉綸函之命。超升蓬觀之華。仍遂燕居。永光達槩。矧斯風之不競。歷邇日以彌俞。固物焚和。覲顏冒寵。功非叔子。歷徇角巾之期。才謝伏波。強取據鞍之賞。甘市朝之末利。忘進退之大方。果藉耆明。追還古烈。甫緣謝病。確爾布階。緬慕冶城之游。近襲鑑湖之躅。固以流古樂喜。坐復于大和。見勞神聰。益增于景算。茲惟雅範。足應昌辰。祁早荷殊私。欽聞高舉。方期拜伏。首枉音題。感鏤所鑒。精微曷狀。

上兩府謝改知制誥啟

伏奉去年三月壬辰詔書。蒙恩授依前官知制誥者。禁掖清華。王言密勿。謬塵高選。擢具常員。志表叨榮。愧餘集懼。伏念祁稟生疋。植性狷疏。因仕易農。緣辰取宦。時惟國教。專育人材。遂藉翁仲之門。入直史家之觀。並游羣駿。寢擘芳蕤。或抱絕容臺。或紉書仙室。觀殊尤于盛旦。竄章句于諸儒。官錄其勤。上或稱善。進籌九府之局。參注二螭之均。泰與日偕。忝隨事積。旋屬舅親武政。慈聖見憐。謂進擬于異時。必妨嫌而煩請。弗由僉論。直寘禁聯。成命自中。聞者皆竦。奈何屯蹇之運。疴瘵夙纏。全劇無常。倚徙多阻。比請聞

而得見。輒頓首以白陳。願守僻藩。少紓羸疾。俄蒙下蔡之組。間換宛丘之章。課不時升。法當有殿。朝恩一解。召節臨頒。還合關門之符。重瞻戶牖之坐。危心散膽。悸魄安妥。然早夜以惟。材分知止。未卽衰而老至。不稱服而災生。日糝眩花。髮垂紛葆。方將奉還潤職。仍丐州麾。收桑榆之未陰。答天地之全施。不圖甄齒更逮。獨微。蠲試可之成規。自代言之親補。拜脫三陌。循襟九回。伏況書命之司。風烈攸繁。本之渾灝。濟以純深。追周監之多文。討漢興之爾雅。布昭于外。潤色須工。權輿毫端。鼓舞天下。詎宜頽晚。可玷詳求。上墮郁穆之風。自取稽留之悔。寵靈云誤。褻進有基。斯蓋閣下敷敘。羣倫邁種。昭德審無他惡。惜委寸長。啓佑清衷。財成慶澤。使隕跼復蒂。靈駕還驅。脫重險于風波。曝至情于日月。謹當益探前載。徐繹大猷。服勤蚤人之常。慎對省中之語。一簣而進。稍勉于有成。萬折必東。不乖于攸趣。有如自昧。可賈明神。卑情無任銘恩佩德。激切知歸之至。

回李舍人謝知制誥啓

伏承寵牽制綽。進直禁垣。除日駛騰。公言胥朴。恭以舍人思經民極。迹踐聖藩。對于亨期。光我王國。含章襲美。遂暢四支。應用觀能。不名一器。故步書林。以文顯。持使節以幹聞。上簡帝心。陰儲士望。適以右闔虛坐。雅誥須才。被召三槐之廷。試草五芝之檢。程文甫御。定命俄頒。哀然垂髦。式是辭省。漆墀叨謝。聿新染藻之章。宰案聯輝。尤重判花之體。況代言之任。歷選甚艱。必潤色討論。鄭無諸侯之難。以深厚爾雅。漢同

三代之風。惟今值賢。訂古無愧。必且言參粉澤。資百度而光華。筆隱風雷。浹四方而鼓動。敢圖謙榮。謂接明襟。推嘉會之所從。墜餘音而申眷。豪英在選。方欽名世之華。翰墨相先。更篤與游之幸。載循欣懌。罔喻端倪。

回余舍人謝知制誥啟

伏承進直禁垣。已申面賀。伏以紫微舍人。器涵疏達。學貫本元。由發策以逢辰。久牽絲而從宦。參籙芸秩。入服書林。恥猛進以干榮。每危言而蹈道。自結明主。數上公車之章。失意貴臣。遂被長沙之謫。關間歲月。轉側風波。蒙沴雪以青青。貫濁河而湜湜。神明與正。聰目咨賢。果副朝命。顯躋諫列。玉管削而方貴。朱被研而愈升。雙筆外階。列詰言于左史。一封出塞。得要領于東方。揭節未還。除書已降。甫通辭于絳辰。卽嚴僊于綸闈。吾黨相欣。斯文有屬。方且繹太常之奧。泝渾灝之源。言代雷風。竦四方之鼓舞。文含雲漢。助萬物之光明。展窠自茲。圖溟叵測。猥紆謙德。肯睨長賡。因感激于亨期。引切偲之餘論。虛名冒忝。向包糠粃之羞。榮路趨陪。今賴芝蘭之益。舞嗟銜戢。訥鈍匪宣。

上外任兩制謝改知制誥啟

比者。叨恩宸展。授秩祠垣。內揆屏疎。舉叢榮。慙竊念祔器。非周用。仕偶丁辰。著籍皂衣之聯。待罪綠圖之祕。稟生多疾。味死請藩。間守兩州。甫更三歲。績幽宜黜。上赦弗誅。亟蒙趨節之頒。歸服持荷之從。未淹浹

日俄掌命書。特免試言。趣令就職。長年廢學。絕無潤色之工。天分思遲。必抵稽留之禁。茫然卽寵。惕若包羞。此蓋執事早諒。羈平顯爲褒飭。兼收短技。弗使平除。誤推轂于仕階。得演綰于瑣闥。敢不澡疏煩忍。研討舊常。寢闕雲漢之華。參裨金玉之度。冀申尺寸。仰謝題評。感素多倪。勸談安敘。

回彭王三舍人謝知制誥啓

向承茂擢。已展慶儀。恭以舍人陶粹天崖。含章聖域。親逢千載之運。寢露七年之材。熟復辰猷。雍容公路。黃鍾大呂。常默蘊于鏗純。拱璧天球。不外矜于追琢。居然難進。況也大成。果膺給筆之求。庸賁摛華之敏。言泉注射。墨藁紛綸。終篇晨達于上方。成命暮頒于右省。士林嗟舞。都紙貴騰。粲身魚而飾金。錫笥袍而染藻。方且夙循豹式。敷繹綈封。九變知言。貴羣條而下振。十行成札。演定命以風行。甫顯得賢。遽煩點翰。因亨期之鋪述。謂素謁之推先。然而平日撫塵。幸同歡于方朔。乃今視草。固所望于相如。戢感自中。拜辭之辱。

回外任諸官賀改知制誥啓

嚮解郡符。入朝天城。蒙臺家之過聽。俾綸省以司言。制授已行。訴還無逮。內循衰晚。久廢討論。思苦長卿之遲。謀罕裨諶之獲。寵光浮量。慙慙裝懷。敢謂執事推轂交情。提衡仕轍。樂聞成命。馳述慶辭。恣加丹臚之華。陰示帡幪之庇。冀藏嘉惠。庸代良箴。僊直云初。費詞難屬。感悚多緒。萬一匪宣。

上京東運使陳司勳啓

假守兩藩。初不聞問。溯風千里。未克治書。姑欽握節之勞。方倚轉芻之餉。懼貪倣畏。財賦滋豐。居然相門。挺有賢嗣。敢圖謙下。流眷屏羈。屈四牡之雄嚴。寓一函之勒綴。服也無斃。心焉願銘。況聆朝譽之騰。方崢皇僚之峻。茲爲企禱。固倍等倫。

景文集卷五十四

啓

上蔡州夏太尉啓

忝守近藩。幸臨大府。飛郵通問。踰履蒙收。閱方墜之禽。振其毛羽。噓已枯之木。奮乃條枚。身匪無知。恩歸有所。恭惟太尉。天挺懿德。邦咨大猷。一其精心。又我不載。竹筠松鬣。迴貫于霜秋。蠅點夜脂。不塵于玉色。故能從容自保。間隙莫乘。斯文賴安。吾君倚相。雖作屏侯。旬而乃情王家。欽聆朝制之頒。顯服乾台之冠。竊商公議。莫首茂勳。願御太和。垂副輿望。祔方須交印。尙阻造門。翹溯所天。惛黯無喻。

上夏太尉啓

伏自太尉肅持齋鉞。出屏奧區。總師節于中軍。暢天聲于西略。諏辰前定。樹政允和。惟中外之瞻懷。宜神明之禮勞。隱居一面。界上國之金湯。下自九天。失殊隣之七箸。重威臨撫。丕續崧光。動御粹沖。上膺欽倚。祔庇司計帳。阻蹟賓綦。姑含螭陛之宅。行記星巖之命。此焉傾嚮。巨旣敷陳。

上宣徽王太尉啓

伏審肅膺成命。入鎮近藩。伏惟慶慰。恭以太尉忠貫穹淵。勳高河岱。夙持齋鉞。進筦天樞。懽動四夷。勤勞

三事。盈虛更踐。溜磷靡移。向緣載斗之區。申尋撓酒之約。暫煩臥鎮。遽折陰謀。二侯並囊。一封講好。亟騰冲懇。求假善藩。朝家重違。制可過報。欽惟陳宛。密倚畿寰。幕府盛開。式重條侯之貴。雅諮參贊。允旌南仲之功。聊駐元戎。方還王室。祁幸叨守屏。將獲交章。榮慶所深。筆舌無喻。

上楊太尉啓

茲者。太尉以本兵之重。作輔有勞。參注安危。式憲文武。膺一人圖舊之眷。恭二節走朝之儀。初無辦嚴。不俟安駕。舞驂旦佖。卓馬載華。桓玉焜煌。趣展當陽之覲。形闢體貌。載延晝日之咨。中外傳聞。紳綏瞻慶。祁嚮隣壤。社。今覲還旂。方依萬類之鈞。猥奉八行之諭。台光破郤。危惻凝歡。恨符節以坐拘。望車茵而欣跡。

上永興太尉啓

伏自太尉稱媿元戎。肅開盛府。便時有素。樹政載和。副列辟之具瞻。本明神之攸勞。符階相比。允繫夾輔之勤。臺節並囊。兼寄帡幪之賴。諒孚順嘏。上協簡心。恨沿牒之前拘。阻飾幃而趨侍。永惟嚮嚮。莫喻名言。

上晏太尉啓

比丐郡麾。願替吏事。章明公府。身屬君軒。雖曰見俞。久而被遣。罔憚畝畝。徑浮扁舟。開秋之初。署事惟謹。然壽春故壤。東楚劇藩。務苦亂紉。才由短絆。益虞速謗。敢議課功。以轉側畏塗。違離恩館。志緣慮怯。感以事新。鍛羽自驚。初無虛矢。危梯方墮。何待鳴琴。尚賴仁人持衡。至公禦侮。納之德宇。非有他腸。幸終大庇。

之私。使無中道之棄。淮山千里。城闕九畿。官箴有常。羈恨無訖。臨風伏紙。言不能宣。

上太尉相公啓

比者獲解郡章。將趨朝次。假塗近闕。伏謁高牙。肅瞻肅宰之規。固應絕禮。辱念鴻唐之老。輒俾右賓。自授館以云初。逮出車之言邁。嗣煩饗餼。和載芻禾。務容醉吏之汗齒。亟接元侯之下飭。迫于會計。遽爾疾馳。鬱搖旆以目中。戀疲軒而無極。竊念祁冥煩惟舊。風績罕聞。頃分虎于善藩。得臥龍之故里。元戎出次。因上冢而過家。前弩載驅。獲望塵而候路。永惟敝政。罔振善經。敢謂閣下過聽謠言。密仲薦寵。以不足而取信。蓋念至愚。靡求備以用人。諒敦善勸。孤生至陋。云補無期。屬問序以日參。邈台光而天阻。願遵願實。下副民瞻。竚聞零雨之來歸。復冠面槐之正位。詎惟單跡。獨庇大鈞。

上太尉啓

近闕私憂。甫鑒病體。久去外朝之著。罕修執訊之儀。跡係民廬。神馳義府。恭惟太尉結宣金石。忠貫天淵。總離衛以誰何。訓善經而肅給。百祥助順。彌厚于福基。三接蕃恩。永隆于邦翰。孤乎無以。埏鑄攸依。

上韓太尉啓

伏審光膺恩冊。茂建將牙。伏惟龐慰。恭惟太尉道付粹和。神挺忠亮。以才自奮。逢聖有初。發于謨謀。式是文武。訓定西略。已假靈臺之師。參幹中樞。遂成天下之務。均賢外闕。乃心王家。匈奴失箸。以畏威。疲忙緩。

帶而蒙賜丕續升狀。中展簡襟。誕告黑麻。昭俾師鉞。進視上裘。移總太原。朝言僉同。列辟歆豔。然帝賁上哲。民思大鈞。秉羽偃藩。雖枳維之均重。刻書進拜。疑桑蔭之難淹。今茲治行。實啓歸輔。祁髦聯冠佩。今託幘幘。側聆褒音。倍百常抃。宿官惟謹。趨府未諧。

賀范太尉啓

伏審光膺詔旨。臨貳帥符。除日四頒。公言三允。太尉沈謀先物。積閱映時。出車于西。臥鼓無警。亟緣褒典。移佐朔陲。屬壘雲聯。仰九天之下將。和營風靡。企三日之先庚。顧惟儒掖之人。謬假幕廷之節。屈紆英躅。垂佐中軍。欣素所叢。訥言非敘。

回夏太尉啓二首

嚮者。築壇疏寵。任屬舊臣。跪轂啓行。趣開盛府。耿存心于南闕。副延首于西人。審卽令時。已觀戎政。太和憑厚。繁祉順膺。太尉業映九功。謀經三術。亟躋台路。再筦皇樞。又衆志以交修。滿公言而無間。比從藩榮。回總計籌。慎致民財之豐。彌簡帝心之眷。果緣謀帥。遂倚圖功。分虎殿邦。剪鶻分壤。出于左右。由漢后之知人。敦我詩書。識晉卿之制勝。諒資成算。益懽稜威。共欽歌杖之辰。前啓坐槐之拜。敢圖攜志。遠錫芳音。列感緒以鋪菜。味吉辭之寶至。永期銘鏤。姑志恩憐。瞻頌所叢。文陳罕狀。

屬者。太尉輟務天臺。懋恩將闢。裂京營之近壤。來建中軍。總關隴之上游。別開盛府。恭聆善旦。參布寬條。

甫光注賴之殊。允契休嘉之集。森茲裔種。孤我朝恩。雖上德包荒。議貸先零之罪。而善經防患。聆咨細柳之屯。佇卽敍于戎疆。永折首于廟算。嘉庸所底。休運來同。祁旱荷品題。今遙趨伏。敢期台造。先枉教音。均察父之慈憐。重孤生之感慨。庶緣舊物。終託洪鈞。銜篆之叢。名言罔託。

回陳太尉謝啓

伏自太尉膺堯舜之舉。服寵齋壇。敦晉讓之風。布誠需奏。垂聲音而敦勸。鬱蕃錫之焜煌。允協公言。趣申成命。對揚陛幄。祇受麾旄。暴于見聞。先我彝篆。左右之爲將帥。遂訂西京。德義之本詩書。用光中府。猥煩題誨。曲示謙儀。抃私悃以增深。寓尺緘而何述。

回李太尉啓

伏審顯奉宸恩。就兼戎壘。居幕府折衝之任。用假鷹揚。領羽林宿衛之兵。遙資肺附。親賢參倚。忠毅兼推。渥命霑行。榮函首暨。閱謙言之敷悉。慶使範之光華。其在欽銘。併于誠悃。

回壽州楊太尉啓

伏念淮月屢弦。楚風增慄。退企齋壇之重。方應制閭之雄。右武克和。南公謨誦。猥煩輕驛。垂賜芳函。森有味之詞條。服彌光之德柄。且承常履。載集順祥。雖琬節之繼臻。顧金城而爲賴。益加遵衛。參副勒銘。

回都知太尉啓

老辭法從遠守塞屯幸一候之無虞且九農之告稔是容拙宦未曠攸箴太尉軫舊興懷勞謙稟德弗責通書之間遠詒執訊之音存獎兼常銘藏何喻惟陟降于禁闕方簡注于宸帷願保太和式符深禱

答并州韓太尉啓

伏自太尉建節洋道開府并門明喻上恩申慰善俗萬夫圖視以觀化列將扞股而畏威尋附慶辭未通便使而乃屈大國之重敦隣邦之和前損台銜茂申聘旨獎以情厚位緣眷隆伏況真將軍之尊自殊假帥舊令尹之懿方仰前規欽鑠歡言永爲惠好

回河陽王殿丞啓

比過大邑枉迎餞勤勤不任愧荷新路甚佳但白水一記略不言足下分寸功已白田學士改撰碑刻兼景德中曾修此路爲浮論所奪在興州顯經中今足下能成之益見至公之難也

賀監郡殿丞啓

浮祿計廷流光歲管敗材傷錦方百謫以自逃戴盆望天固兩施之莫獲瞻言締友遂闕嗣音日以翹勤心焉惆悵監郡殿丞厚將謙意緜布辭情越山阪之險塗講松筠之堅操遠而相致但服于命儒藏以爲榮更均于占牘並游易日良食惟時欽佇計還式符朝錫

回李太傅惠御製挽詞石刻啓

兩日前伏蒙尊慈以御製先中令挽詞石本垂惠者。宸章悼往。恩煥冥塗。孝嗣欽光。志垂終古。輒忍哀而灑翰。方圖刻以傳家。上昭子道之全。次記天嫺之盛。足揚茂烈。參紀無窮。祁忝預雅游。猥闕珍刻。悲叢昔感。義服來徼。但期屋壁之藏。均仰乾文之照。日餘伸罄。更竢披承。

孫判官啓

伏念夏雲成簇。膏餞于歸轅。冬雪飄花。方窺于還尺。阻受辛之縣紼。緩搖旆之勞勤。始悟過家。久留翹乘。椎牛上冢。恣追道舊之歡。掃葉飛柯。徧識幽尋之地。克涓秋序。乃冠賓儀。嚮用福以惟寧。專致柔而有禮。靜言髦舉。素揭令名。再從盛府之游。頗屈清人之議。天蘭挺美。諒無人而自香。國馬斯材。竚過都而歷塊。慎齋爲右。傾否何賒。忝締朋簪。敢忘心禱。

到任上兩制啓

比膺中詔。移守近藩。獨入謝以致虔。許之官而從使。卽因良月。祇服郡條。循揆上恩。猥并歡素。伏念祁天鍾愚直。任忝華亨。不衷取災。无妄成疾。移書賜告。動輒旬時。請問願塵。向蒙開可。值淮肥幽。殿望止罷歸。敢圖藏疾之憐。遽徙陪京之屏。疲軒載舊。秋蒨重跼。胡爲泥中。蔑有衛人之嘆。已爲關內。居無漢將之慙。此蓋閣下恕以推心。形于引重。先迷弗遠。終惠乃長。庶陰德之能銘。匪貌言之索序。趨陪尙阻。蘄向增勤。

回亳州韓郎中啓

託藩維梓。最密台光。恃舊遺簪。時修書舍。剡聞五袴之詠。參潤九河之餘。景式焉依。銘銜知所。敢謂足下。輟棠廬之暇刻。占囊几之圓封。申諉嘗僚。顧存弊邑。啟廢窮紙。內手循衿。何三秋之帶方零。照同蕃藹。而萬物之爐故在。待若祥金。乃知至仁。初無棄物。姑慙鈍訥。靡稱題襲。文組見縻。側階告遠。馳神注想。搦翰笑言。

上兩地啓

今月初五日。進奏院遞到官告敕牒各一道。以崇文院書目成。蒙恩加前件階勳者。鴻都四部。甫以書聞。東觀諸儒。竝從恩賜。嘗預研摩之末。亦需襲紵之華。內省循榮。盈顏集愧。竊念祁晚。參紬績。最惡屏虛。緣衆目之已成。顧殘編而須具。猥由未至。僅纂餘功。上則咨典領之英。下則賴討論之熟。彌年佔畢。未知朱紫之分。他日請麾。遂棄鉛黃之習。身嬰俗狀。分隔文林。敢圖祕錄之成。普第陳篇之效。眷言孤偃。例辱甄揚。崇躡文階。優加勳等。爲山而簣。初無就效之勞。弗稼而困。卒冒因人之賞。斯蓋閣下輔裁不花。勵最彝倫。謂一割之前施。苟寸長而必取。陰爲獎地。傳致恩章。出守道遐。讓還天遠。姑勉修于扞格。冀云補于陶坏。感緒叢臻。窮言何喻。

代回鄧太尉啓

茲者太尉懇辭禁衛。請治候藩。亟升空士之華階。改葺茅苴之近社。駢臻寵數。式獎成勞。猥貽讓爵之言。

彌見崇謙之懿。矧聆明命。已布外廷。冀少抑于沖謙。卽祇承于渥典。欽銘愧悚。叢集于衷。

回曹琮太尉啟

迺者太尉促勤封傳。還控邊州。尋承麾蓋之華。坐制金湯之重。營平先計。姑養漢威。方叔壯猷。寢光周詠。日剽公朝之論。載欽賢帥之風。敢謂英私。遠貽誨翰。露教條而有斐。挹謙柄以彌沖。徒爾心藏。闕然時答。仰惟淵度。貸此苛文。秉羽在辰。耀烽徹警。益符神勞。增嚮福綏。瞻詠所叢。敷題罔愬。

回河東柳按察啟

伏自使輅東撫。載耿騷離。書舍右傳。首煩辭誨。布諄勤于言味。寫綦馥于情條。隱几孰窺。題襟增感。惟晉邦之地沃。本漢斧之任雄。銜軸轉輸。舉調盈虛之節。明綍下諭。允彰宣布之風。益御太和。上符丕眷。盍簪未日。搦管奚云。

謝許州賈侍中啟

避嫌計省。留守圃田。宿官如期。中暑成疾。方苦採薪之劇。遂稽進記之常。敢謂太師侍中。念封壤之鄰。顧簪履之舊。前遣使介。臨賜教言。饋品紛盈。公門光寵。撫危心而按堵。殆感涕以霏衿。伏況大丞相之位尊。猥諸侯之地介。降禮非便。拜賜難勝。尚緣老馬之仁。通枉端平之問。佩恩有紀。論報何階。

回宗兄員外啟

伏自去夏。奄遭酷罰。尋解官簿。退伏民廩。藐然孤苦。濱于殞滅。宗懿在遠。號訴無從。歲月不居。中祥行及。五情摧怛。奚所追逮。敢期宗兄員外。遠墮書幅。傳達苦慮。隱恤哀迷。收齒疴痼。銜佩愛勗。交集涕洟。餘生未死。論報知所。書研久廢。言敍不倫。聊奉手狀陳謝。

上孫員外啓

伏念膠投夙夜。契久荷于同心。波委流芳。游傷懷于頽魄。慨繫匏之多累。約炊黍以無從。員外茂質淑均。瑰才清劭。早奉庭詩之訓。頗興僚俊之嗟。一昨恥官次之鬱棲。奉鄉書之鶚薦。多士褰裳而就列。春闈揆藻以飛聲。雖投刃之有餘。終引商而寡和。兩嶠輕進。暫卹于壯圖。柱壁空歸。未傷于全寶。尤希消息。別奉慶靈。祔喪紀已終。幹魂來復。退思窮處。道在糲而不揚。進欲妄求。性爲樵而愈失。夫何舛運。遭此窮塗。嗟我石交。越在他壤。莫追縷悉。安緩慙煩。節物向榮。道腴加嗇。南望川陸。不能奮飛。

回襄倅張著作啓

曩以奉外臺之傳檄。因止漢南。緣伯氏之交符。得趨鈴下。自茲睽迷。三易寒溫。間收社稷之材。入玷橋門之館。百函之責。絕附于行人。半面之情。宜忘于車匠。敢謂執事。乘政條之隙。篤士類之情。申戒齋防。顧存閒冗。兼金吐訊。踰荆部之丁寧。墮月抽毫。奮芝筭而罪灑。內循葦爾。永刻恩斯。矧訪會筵。昔緬雋軌。兩丈之諸生多在。撞鐘之舊矩焉依。復此拜嘉。并爲深幸。所嗟留滯。尙阻趨陪。傾聞走節之朝。用緩搖旌之思。

物華具秀。春齊加調。

回潞州郭觀察謝上啓

近者執事光膺宸綽。移領州符。飭追靡以無留。敝黃堂而坐治。通書未暇。矢簡載勤。承布詔條之寬。已孚風化之美。然魏邦公子。諒存闕以爲心。而漢氏侯封。竚入朝而拱衛。勉調冲用。綏集太和。引祝于茲。遽談笑極。

上徐州判府相公啓

嚮屬綿疴。罔勤四體。仰煩移告。遂曠十旬。中苦結轡之煩。久愆奏記之間。注情東夏。延首貴台。承福祿以萃臻。撫翰垣而俾乂。恭以相公材經而國。功裕于天。祇六德以益嚴。滿九言而無過。游茲出處。均我賢勞。姬公來歸。頗鬱東山之思。留侯爲壽。時想赤松之游。益冀暢和。上符同體。永言舊物。茲僕洪鈞。

上賈相公啓三首

伏以春塗韶婉。邊候綏寧。嬰攀文組之華。寤寐材翹之峻。恭惟閣下。委遠時柄。倡導藩維。訟息而民堵安。兵戢而顏行整。憺威殊俗。報政上臺。暫留北鑰之嚴。行復乾台之冠。內惟一物。永託洪鈞。伏以楚艾祓神。周甦告斂。有司靜事。君子順時。惟翰垣控制之雄。方亭障伏寧之裕。略去煩細。取適高明。道薦太和。神介多祉。隆本朝之幹棟。亘華夏之金湯。悵所攸箴。未諧入謁。瞻風在上。引領增勞。

伏以天贊丕圖。帝讓良弼。會霜秋之協鉞。符神岳以生賢。恭惟閣下。國棟隆材。宗彝重器。暫爲勞于左輔。方倡治于諸侯。蓬矢戒辰。翠綏肯慶。乾台將鉞。已圖績于同寅。絙月仙椿。共歸年于難老。永扶王室。垂庇羣倫。祔方屬乘障。未遑趨屏。永惟慶抃。第竦瞻祈。

回并州明龍圖謝改諫議啓

近審廷褒制綈。陞序諫垣。伏惟慶慰。竊以諮訪甚勤。獻替攸重。冠七臣而分任。均三接以造言。惟爵之隆。值賢而受。恭以閣下。猷爲交濟。名實兼華。久典南屏之麾。仍重東臺之秩。甫修函牘。仰慶齋鈴。辱行舍之前通。紆記室而流問。宣風屬部。且符竹馬之期。召對西清。卽參槐府之論。矜膺可復。感頌奚殫。

謝送碑啓

伏蒙以顯功碑墨本二軸垂賜者。天祐孝節。聖錫寶題。惟先王之有終。冠元勳而獨出。必繇論譔。揭示方來。執事仁明所根。負荷爲重。悉資傑筆。參鏤翠珉。奎鈞上騰。自有恤功之念。然羣攬視。固無可愧之辭。祔久庇末光。祇膺厚賜。丹青在目。韶濩鏗音。冀資不朽之名。益熾無疆之祚。感悚于是。敷述奚云。

上江南轉運郎中啓

久伏民廩。近還閭籍。多難幽憂之後。學殖寢荒。平時英俊之遊。書滕殆廢。載懷高誼。實耿離悰。轉運郎中望秀材林。業偕賢運。亟樹風于官次。治廣聽于聰謀。久資郎署之賢。外駕使輅之傳。千艘銜尾。大集于中。

邦。二節追鋒。行階于上。笏崢嶸歲晏。悵鬱人遐。願履常休。用紆遙款。

上新轉運張郎中啓

伏承祇奉臺音。仍持漕節。涓辰視事。卽日騰書。肅使範以先馳。藹民言而交慶。執事系承世閥。材映吏師。踐揚薰省之華。更奉輒刀之熟。職思而辨。上所自知。比膺朱閣之求。將從暢轂之任。拒榮固讓。還秩見俞。遂眷三洲之南。游刺百城之劇。簿書鉤校。聿嚴露檄之期。食貨懋遷。還佐大農之藏。茲爲倚任。足示褒蕃。祁肯接官聯。今叨郡寄。其諸多病。真爾不材。幸緊廉按之餘。容免平鑄之峻。歡言企詠。參萃于衷。

回鄭州王相公問候啓

謬塵禁籍。不做常箴。再瞻坐府之嚴。稍魯奏記之禮。永惟溯戀。徒戢精微。恭以閣下道契臣鄰。敬孚樞極。暢經謀于宰路。申著蕭規。激高讓于邦風。游光周屏。蹈中和而弗跲。脆戢穀以攸宜。惟是寰封。均于潤福。介圭來覲。固無信次之勞。巖石具瞻。況有僉同之舊。但虞息偃。難廢延登。冬律沍寒。歲芳凋節。益儲茂嘏。永對昌期。進謁未從。臨風增企。

景文集卷五十五

啓

上端公啓

伏念祁凡近之姿。塞運有素。體中論點。曾不半癡。稷下從談。何嘗名學。徒以遭時文教。記訓師門。追琢其章。丹青厥采。誤輿廉于舉目。叨服事于官儀。向屬閣下中執。霽威外臺。握節更張。治具森布。懿綱以一介之孤生。戴二天之巨庇。賦角弓而植嘉樹。寶燕石以襲重緹。用法語而發蒙。露薦章而保往。雖有小紙。必勅其報書。弗遣長刀。揖之而就席。乃至官刑百謫。民政一坤。人有多言。課裁自脫。免攸司之効舉。俾終歲以罷還。任非異人。我叨其賜。祁以濫恩。慈辰叨秩京司。洊奉上臺之符。入佐冑筵之講。已綸而綍。大畏于罔功。既負又乘。自虞以致寇。斯蓋伏遇閣下。顯持邦論。飭育士材。品以月更。言無人廢。謂飾之犧象。莊生之材可收。謂試之螳封。督郵之馬差勝。遵茲德賞。溢彼智涯。不然者。遽蔭戚施。記入官師之用。猪苓馬敦。奚參藥籠之珍。由技飾之驟加。俾懦孱而與進。敢忘日省。上誤爾知。有肺附以內銘。豈喙長之彈敝。

上大名相公啓

伏自險澁所鍾。痼瘵亡幾。竄身忼日。續喘窮年。託民屋以尸居。顧仕塗而雨絕。坏陶舊賜。有墜無酬。土直

餘生從憂得損。固敢修于奏記。非自棄于所天。蓋乃秉國地尊。負薪病力。距躍思勉。既匪所宜。窮咽萃中。無容多訴。至于兩兩相邇。曉然識乎泰階。奄奄苟存。居爾同于舊物。去冬十一月。鄂州從事谷昌言。取道瘴邑。傳誨諭辭。不圖荒窘之餘。尙齒慈憐之末。秋陽委燭。部屋賴其容光。生符下招。埋醜幾乎復固。無言敍感。有死如歸。且承太尉相公移總師垣。并提武節。暢威有北。全重本朝。屹柱石于兩楹。隱金湯于萬里。鄧侯輔漢。以上宰而分麾。召伯佐周。抗二公而居外。臥收民頌。簡在帝衷。而祁式苦廢殘。阻聞風采。窮生如繫。徂景易逝。溯東閣之故賓。長懷請見。倚博陽之陰德。脫冀重蘇。獲報萬分。迺爲宿計。過茲而往。未識所期。卑情無任望風銜賜。感服哀迷之至。

壽州到任謝兩地啓

〔案〕啟內年月與本集謝上任表相符。

奉去年六月十一日。敕差知壽州。已于今月七日。禮上訖。東楚地雄。左符任劇。祇膺簡授。舉萃震惶。伏念祁天與朴愚。仕緣熙泰。嚮由完劇。超備從官。嘗用親嫌。不任煩使。日費大官之膳。坐代上農之耕。間不遑居。懇求自試。事關三府。恩許一麾。值劇部之將更。果紬書而被選。淮肥之奧。國府遞經。夫井滄繁。稻魚豐賤。承邦條之寬大。洽方俗之樂和。雖曰不能。漸新與政。斯蓋門下邁茲九德。模我製備。在善埴以埴和。俾薄材而進齒。捫心揆寵。念德知歸。署吏牘以云初。扣車茵而未日。參拜感結。拙喻端倪。

定州謝到任上兩府啓

昨奉詔書，就移前件官者。仰對明綽，俯循華組，地由邊重，帥以儒榮。任不值能，顏無容愧。竊念祁短謀腐學，病質衰年，自宜力于藝文，不應強以軍旅。比者承乏眞定，臨制中權，率職半基，無治言狀。方僕被以須去，俄假節而益遷，進領博陵，架控幽朔，營屯雲集，亭障蟬聯。列屬九州，有宜得便于事，裒衆十萬，無日不討于師。號爲劇藩，當待賢牧，寧咨鯁懦，再忝僉俞。伏以閣下明總庶官，輸輿邦緯，廣十取五之路，收百有一之長。謂愚可矜，雖拙有用。遂俾文吏，超攝元戎。所賴敵運百年，天聲萬里，戍餘臥鼓之息，城無早闔之虞。操筆可制豪傑之驕，持簿可期租賦之人。倚國爲重，積日賞勤。不然，巢林一枝，素省身而斂分。假令入竹萬箇，甘贖罪于曠官，埏冶不私，帡幪知所。

定州到任回諸官啓

解符眞定，易地中山。未成五月之勞，復忝萬夫之長。適詢副貳，竝屈俊雄。得聯紙尾之銜，參重幕庭之選。息藩爲幸，庇短云初。何枉勤私，先貽慶問。叢麻可倚，誠有助于飛蓬。揚糝在前，恐貽羞于嘉穀。內名賫惠，實託餘光。就部方勤，盡言安敍。

賀孔諫議上任啓

伏承諫議改佩使符，近臨鄉社。咨諏今日，宣布寬條。惟盛德之世祠，冠大東之誦訓。千將沃若，式觀上冢之容。粉米稽如，更重趨庭之訓。猥迂緘翰，申費公儀。矧禮義之舊邦，加中和之美化。諒無遲報，久沃詳求。

感戴傾勤併萃中府

定州到任啓

今者祇奉詔期。已如官次。薦煩假節。益壯護邊。內循空虛。日用慙震。伏以中山之劇。朔北稱雄。塵帑萬櫓。鎧械億計。暢穀蔽野。高墉聳雲。屯壁駢集。以相望。諸將奔走而聽命。宜待才選。庸緝事經。而祁衰老之餘。慙怯有素。傷羽不擇林以息。窮鱗僅得水而安。何意朝僉。過仍師節。賴名臣之前治。轄郡務而有條。坐遵成規。便足爲政。短髮雖白。幸弗事于論兵。髀肉自完。況無需于汗馬。永言榮遇。特出誤知。冀一割之可求。詭萬分而爲報。宿箴仍率。瞻屏爲勞。

上兩地謝赴闕啓

今月七日。奉被敕書。候替人到。交割訖。發來赴闕者。彌年假守。有詔代還。許訖交章。趣令上道。榮生望表。抃激情端。伏念祁向以塵榜。忝班禁近。病多告數。量極謗興。恩俾興州。責深共治。雖勉迂儒之學。曷揚循吏之風。幽績屢聞。殿科輒寢。內遷右輔。間默煩言。適以元帥勒歸。邇藩須屏。因蒙召節。再服君軒。得上銅魚之符。入趨金馬之籍。肉我枯藁。植其危根。大鈞所陶。沒齒奚報。然念支離云舊。奔走相仍。兩目眩昏。半頭蒼白。收從江海。遂安北闕之心。行及桑榆。敢重東隅之悔。翼趨有日。舌訥難宣。

回季團練啓二首

向忝從官。弗經煩使。請問求見。頓首自陳。願遂州符。習知吏課。而蒙可制。副在宰司。謹成數月之酉。乃有一麾之授。逮茲班詔。始復知榮。地跨蟻淮之饒。鎮兼犀節之重。茗醯參會。魚稻豐饒。蒙幸于天。酬恩曷日。敢謂足下。負忘疎遠。彌篤顧存。勅記室以占辭。付行郵而流問。神麻在握。頓紆遠客之懷。秋蒨辭條。滋積故叢之戀。庀官云始。修謁未期。善膏泰和。式符遐福。

冒榮踰分。因病早衰。比不自遑。願諧外補。一麾蒙可。三府見矜。獲引壽春之章。遽結承明之棗。淮山勝秀。秬稭夥饒。坐閣省躬。貪天藏疾。然念間關去國。晚晚驚年。危眊涔涔。屢傷懷于遠道。羈飛跼跼。方破膽于虛弓。庀職云初。趨風未日。永言悵戀。拙布謝詞。

回朱給事啓

比者給事入修觀禮。奉望帝暉。魁壘爲儀。重漢庭之皓首。任闕注意。眷商國之舊人。亟奉綠綈。再陟青瑣。會細書之共治。掩靈淵以䟽封。自霜籥之丁辰。抗風旌而首路。恭承便日。已振寬條。遽沐飛文。曲敦永好。伏祝青松貫歲。援君誓以未忘。零雨在天。詠我來而均企。方期樸朽。薦託雲陰。何煩記室之善辭。但服歸藏之謙德。願遵保理。益輔耆明。蓬曲猥驚。筆精罔敝。

回知南京俞給事啓

嚮者多病乞麾。蒙恩假守。危心積忤。劇務間嬰。逃瞻萬戶之康都。曠致一函之私禮。心焉慕嚮。日以翹涓。

不謂給事垂卷下邦，遠形芳牘。至言抉牘，嘉惠噓枯。聿沾齊釀之甘，申造齋刀之熟。重爲褒脫，交積肝膈。如聞京室之傳，將被節臺之召。斯人蒙福，諒均愛樹之歌。哲老還朝，遂重歆雲之寶。王塗云穆，士議載孚。望安百順之宜，欽副四隣之待。銘銜企願，滅裂罔宣。

致政侍郎啓

爾日動用佳宜。某去門下已三年。戍邊未得歸。鬢毛禿落。衰疾相仍。賴朝廷威令嚴具。得以刀筆繩吏下。爲供職。然日夕內慙。孤太上方面之選。未奈何。才短責煩。得無爲老成嗚噤耶。比驅使回鑒教。并賜沂公集副。拜賜欣感。前日吾文錄遺事。丐天篆立鄉名。今又哀文章爲一家言。獻臣冠篇。示千載不疑。立德立言。兩無讓云。

回壽州張侍中啓

〔案〕侍中即張書。書自陳徙壽。故祁自壽徙陳。啓云易地以此。

嚮緣易地。得途趨風。略接台華。遡勤行後。守藩云始。進記未遑。敢謂侍中敦好士之風。厚交符之契。占詞記室。流問行人。屈衛霍之雄稜。講楚陳之盟好。外依獎眷。中激衰屏。官有職思。書非言盡。永惟銜佩。姑誌挺銘。

河陽夏侍中啓

向解州符。入陪禁籥。鍛羽重奮。勢固未安。重創始平。理當滋愼。不時通于奏記。恐仰累于所天。久而省循。

乃敢參訊。伏自侍中避劇右洛。改鎮盟津。委遠功名。鎮息流競。內保元吉。自存介石之誠。彼有樞心。弗礙虛舟之觸。卓焉高躅。冠我羣倫。但緣一德之隆。終妙三能之冠。願崇賢老。永對貞期。

回趙職方啓

辱書。旨諭諄諄。不鄙僕麤外。屈己所長。以教育英才爲言。彼古君子。葦然不敢當。況其下耶。祁迂儒也。才不過中人。偶以文詞塵內外制。竊舊語陳言。奉行文書。爲宰相假借。幸不敗官。上過聽。以爲可用。故佩三印章。治常山。中山出入三年。無一毫異績。可報天子。齷齪校米鹽。責吏下而已。閣下不諳以任所不能。而更推之。使爲古君子所難。何哉。閣下純懿之德。盎焉充于中。世烈孰儔。然有文不自高。以尙書郎佐二千石。而無難色。僕固知閣下賢者也。才教而有矣。特未用耳。賢而未用。大抵當路者貪知人之明。皆願言之朝。況僕所部。切懷交轍哉。之邵之才。不待閣下槩陳。而僕景仰舊矣。尙何教育之云。閣下之道。固將光明。當時僕雖老。尙能賦著著者哉。以贊太平盛事。餘不一二。

與常州知郡大卿啓

嚮者。大卿被十行之眷。肅三翼之行。少冒秋陽。徑浮月汐。離懷坐耿。淒律遽殘。比自半塗。常煩雙素。慮封人之未定。報記室以無從。恭惟視政以來。介祥尤盛。仁人舊里。太守新藩。過家上冢之榮。置酒揮金之樂。鄉評參慕。仕路罕偕。諒茲愷悌之孚。益助明著之嚮。攸箴異守。接武賒期。擢翰遡風。乃心惟極。

轉端明殿學士謝執政啓

〔案〕啓中八月敕語乃至和二年之八月也。

被八月日敕語。加前件職。尋具奏陳讓。續準九月十七日堂劄。奉聖旨。不許辭讓者。無庸應黜。有詔蒙褒。冒服邇班。長違孤懇。伏念祚性與愚狷。才止枵疎。一玷從官。五踰閏月。雖數見上。而無補。故不稱職。而外遷。寢治邊州。兼護屯壘。視縵胡之伍。既與等夷。顧章甫之儒。巨爲節制。上承廟算。前伐敵謀。用能衣朝服。犒將校之勤。操券最責錢穀之會。牽勉常務。遷延二朞。方虞考課之嬰。遽誤僉言之獎。進聯華殿。仍秩講帷。使人挾齋。賜物紛沓。還恩弗聽。卽寵自惟。以遠戍見矜。是竊師武臣之力。且論治無實。何解上大夫之譏。敢商爲地之端。固本和鈞之賴。此蓋昭文相公。茂襄昭德。垂庇庶工。有所不能。念先容之既爾。久而未召。借賞典以當然。遂令無似之人。得引以長之佩。願圖涓露。歸答挺銘。

回王太博謝高陽關部署啓

伏承光奉制恩。出護屯壘。僉擇惟允。欣頌兼常。執事授器過人。移忠許國。肅提千騎之警。參守四方之封。恭惟河間最重戎閫。副武之劇。武力是資。果契公言。訓定師則。何冲懷之徇好。眷他帥以移文。切仰干城已孚于先甲。自然鄰國可假于餘光。感著歡愉。併萃情府。

回恭撥發啓

近蒙恩檢。俾領藩麾。曾不遑居。已茲署事。顧異撥煩之敏。實孤其治之求。敢謂英私。特詒公誨。玩書筠之

溢美。均永舊之餘滋。方此頒條。尙賒接武。瞻懷感鏤。一二靡宣。

回張資政謝授職啓

伏審祇奉茂恩。寵兼祕職。伏惟慶慰。恭以資政材資挺傑。器蘊淹華。茂對亨期。踐揚膺仕。入侍機要。顧靖密而咸熙。出殿翰垣。允明良而協詠。終然邁簡。膺此崇褒。進規地之華聯。總夾河之近輔。署行詔尾。歡激心靈。遑辱芳音。俯循髮矩。玩敷言之勤降。欽約禮之優隆。感抃兼叢。書辭拙喻。

回張副樞讓啓

伏審光奉命書。入參樞省。伏惟慶慰。恭惟樞密懿文經遠。茂德秉彝。服在光華之辰。居然王佐之器。禁綸經擿。冠瑞羽以爲儀。聚錦直紉。卓孤風而難進。上心克厭。公論所宗。實驗虛席之求。進預前帷之祕。此焉亮采。副是疇咨。還規尙讓之文。猶鬱懋官之授。美言盈牘。始誌于冲懷。成命隨風。難淹于盛禮。願回介節。卽順徵章。欽祝于中。匡略非敘。

回昭文張相公啓

伏審顯奉制恩。冠升宰府。伏惟慶慰。恭以閣下遠謀沉正。徽鑒凝深。外經人髮。入亮王采。萬事之本。爰建于中庸。九德之光。遂陳于歌鼓。鼎鉉以之增重。天階爲之告平。順時登庸。屬我良弼。誕頒允命。式進上司。啓乃謨明。方資于乂辟。載其清靜。幸賴于宗臣。遑辱鈞函。尙遵謙執。幸體眷求之重。少矜冲退之風。下慰

民瞻允符公議。

回陳書記啓

伏蒙尊慈以長牋盛集爲貺者。申誦以還。欽畏交集。恭惟記室員外。雅材挺楚。秀範標華。直取俊科。載沿仕牒。紆幄中之畫。綽有香名。鼓天下之辭。弗忘素蘊。鋪敘積日。搜第盈編。方比能于大夫。使知裁于吾黨。何言無狀。獲此假藩。甫掛賓儀。遽行文贊。研尋繹采。震眩昏昨。璧額于前。雖願營于昌歎。投入以暗。得無辱于夜光。匪曰知音。要之爲寶。輒少留于私臺。將徧詫于文林。銘悚所叢。端倪拙喻。

回文和公啓

文館屬吏。材閑故賓。停節罷州。賜環蒙召。得用塵構之蔽。再侍公袞之華。改館授餐。回車垂謁。思緣舊物。自忘位貌之差。耳聽名言。始恨風流之淺。迫守近郡。遂去下陳。軟帳寵行。都人駭視。卽從便日。已署化條。伏以小國之事大邦。聘贊係道。刺史之見丞相。韉鞋走階。寧有行李之未通。猥煩使者之前至。書教收卹。醪醴嗣頒。屈公府之彝儀。眷州將之辱品。餘波所潤。雖涸轍而迴蘇。和氣交培。諒折楊而有和。望風云切。離次有誅。企戀門闌。飛馳心極。

回人獻賦編啓

伏蒙示及新賦一編。祇閱以還。歆羨倍極。竊惟善賦之作。本出古詩之流。參大夫之九能。判史家之五種。

有唐取士。甲令垂文。揭爲試藝之程。用角陳篇之妙。昌辰沿制。作者寢工。足下儒箴興宗。雅才名世。蔚奇姿于豹韞。文乃積中。從怒翼于鵬池。風斯在下。暫綴修方之式。回光與計之求。尙講鳴謙。過詢情學。列羣章于繡帙。下眞賞于熬波。九變知言。但服春華之贍。千篇奏御。行膺夜石之觀。虔祝王塗。進光賢運。今茲銜佩。詎及文陳。第其盛製。輒敢借留。

回復州乾明長老啓

恭自長老和尙紹膺祖位。宏闢寶坊。接利衆生。漫踰一紀。子孫架盛。功德無邊。方念未來之人。或驟承嗣之託。增上我慢。謗佛自私。因甲令之惟行。露悲心而見託。永惟大士。集此勝緣。宜得斯文之雄。以就多礫之効。猥咨鄙思。俾敍宗風。業已踐言。今茲具草。徒成謬託之素。殆非抖擻之辭。又遇凌君景陽。學該聖門。書入能品。特灑鸞鵠。以潤金石。製爲楷書小樣一本。并用寄呈。但羞廢略之文。必取天人之誚。一慙所忍。千翰匪宣。

回夏州大王啓

伏以夕窮流火。時籥凝商。呂篇紀登穀之期。幽士詠烹葵之候。伏惟大王懋功惟志。基德有隅。罄忠力于熙朝。訓威和于大夏。聿臨涼序。沛集蕃祺。遐枉書文。滋銘禮意。

回張紫微啓

自觀制恩。已仲面賀。竊以禁垣分乎兩掖。最邇密清。雅誥及于三王。慎查出納。肇爲清著。專處烝髦。謹射父之訓辭。贊安于之名命。允鍾聖簡。尤見難才。恭以舍人基德溫恭。博文精祲。清白之方有裕。黃中之美可餐。龔屬芝蓋。時巡。禴祠順祝。扞頌章于帝所。參御漢篇。較材等于乃神。觀升周士。旋武藩侯之政。久淹天吏之期。最日上還。薦章交委。亟汗青于冊府。爰封阜于諫帷。議縣官牢直之益。聊煩奏刀。執左史書思之簡。久次珥彤。果由宰府之試言。入視上方之具草。紋袍異錫。台座聯輝。珠網藥階。于以重凝嚴之地。芝封綈檢。于以裁郁穆之辭。渙號惟行。公言允愜。創龔金馬。伋宣爾雅之風。揚聲紫微。更覩垂光之盛。式欽亨躅。辱枉閭封。味言選以終謙。鏤心微而永好。

回張簡州啓

伏念絳構之吏言歸。已馳報幅。青天之道云遠。涪墜圓封。夫何淡園之望郎。尙記庾池之舊屬。貫四時之操。于以示乎後凋。聯十部之賢。不足方其款密。恭銜嘉惠。永刻煩惊。惟畫隼之班春。開夢魚之豐歲。西人之子。歌後曲以相歡。樂職之詩。續遺聲而加麗。妙儲真粹。輔進耆明。妙中詔以疾馳。綴下陳而偕賀。永言翹戀。修染奚宣。

回徐紫微啓

自觀制恩。卽仲面賀。竊以表帝居之左右。最重掖垣。含天憲之重輕。孰先書命。乃至各居一戶。上法辰躔。

分署五花聯光台座。惟長君之慈獻。總羣辟以慎咨。曾是寶賢。允茲衆錫。恭惟舍人元精播粹。至妙揚和。恥觀非聖之書。獨探大訓。樂遇重華之旦。寢服近僚。鏘鏘鳴玉之趨。婉婉長離之集。青編紉史。久次道山之游。皓髮爲郎。不詭雲中之對。澹然淵寒。隱若揚休。果紆繡屐之知。趣上黃扉之試。奏篇市御。定命已頒。躋龍鳳之觀深。動虹蜺之光采。造庭近對。遂視淮南之書。推食延慈。更重高門之地。方將發揮文誥。磅礴大猷。作世陽秋。爲天雲漢。其綸其紵。贊百度之昭明。迺玉迺金。追三王之灝噩。適符詠嘆。遽閱函題。矧叨聯事之榮。何損撝謙之德。愧同前批。已出于簾揚。竊仰茂松。庶容于庇賴。自餘祇佩。罔罄多言。

回臺直李屯由啓

近叨細札。尋抵劇藩。本緣藏疾之恩。遂有出麾之請。乞茲視事。殊匪觀能。倚惟聖之在寬。異攸箴而脫諉。敢圖眷舊。遠賜褒存。曾是危心。賤餘驚于摧擢。居然晚歲。仰純茂于寒松。市限麾符。阻陪紳袂。戀悵感緒。參集于衷。

回大名李相公啓

伏審光奉制恩。榮分帥節。伏惟慶慰。恭以閣下地居賢亮。業挺謨明。歷相三朝。迭蕃四國。直躬蹈道。種德在民。具爾之瞻實同。一哉之心允協。比緣巨屏。遴擇守臣。果屬吹塵之賁。遂寵齋壇之拜。使牙肅建。幕府宏開。包魏壤之河山。奠居都會。掩天街之畢昴。繫賴撫和。諒此殿邦。何稽入輔。祁幸聆成命。參奉贊書。方

抃私懷。遽窺鈞翰。荷巖廊之舊庇。銜義府之餘恩。感愧所并。文陳罔逮。

回外任郎官啓

幸聯郎舍。晚盍朋簪。間緣客鯉之來。厚枉書筠之問。章兼辭篤。感與愧并。欽惟陵邑之封。慎擇星曹之俊。歲成玆報。宸獎茲蕃。願遵明晦之宜。交集康寧之祉。竝遊未日。結想何言。

賀宋鼐長舍人啓

自觀制恩。卽仰面賀。竊以紫垣右掖。上憲經星之圖。內史贊書。實賦隨風之命。慎咨髦譽。亮采官成。本國僑東里之材。聯天老上之坐。式鍾下武。彌見右賢。恭惟紫微舍人粹稟天均。謀經王體。森然戟庫。默蘊于神鋒。卓爾澗材。迴標于國棟。亟階膺仕。茂對真期。覃乎揚子之深沈。濟以荀家之惇惠。道山善志。徧窺典籍之林。郎署久潛。厭視文書之草。多士賴司南之悟。薦紳歸祭酒之尊。允會講求。果先圖任。三槐開府。聊命于試言。九齒美塗。俄觀于進拜。蹈紫宸而點翰。奉綠底以數辭。大號有孚。至公胥協。諒以鋪芬奧義。粉澤遠猷。賁天漢以昭回。體王綰之慎出。矧茲竝命。莫匪正人。鄒召枚延。交美得賢之論。虞渾商灝。益敦稽古之規。適聳歡懷。遽窺華檢。佩一謙之多益。非九變以窮言。

代胥舍人謝啓

伏奉制命。以本官知制誥者。經星祕掖。素號于凝嚴。瑞鷗神池。驟陪于機近。被褒函之載郁。紆賜紱以增

華宿昔自循。震慚無措。恭以國家裁成訓告。稽合本元。監渾灝于三王。討溫純于二漢。猶綸之出。愆慎于
始基。如天之章。昭回而臨下。疇咨邦彥。進宿官成。是必積美彌中。高文近雅。挺安于秉筆之操。本周興輶
積之流。爲國丹青。有古風烈。始符僉論。姑免冒居。若某者。生本地寒。長而祜薄。偶易農而顯仕。因挾策以
觀書。能賦能銘。未習大夫之事。小言小道。纔齒稗官之流。濫貲相于里人。預偕來于計轍。過塵策射。旅贊
部章。歸課上臺。玷名仙室。佐閱吏曹之實。問圖綿野之儀。日幾之繁。墨綬茲忝。賓興失實。切免去邦。旋蒙
三赦之仁。追引九門之籍。洊膺佐治。遂俾出麾。棄杖復林。塞灰始焰。逮終更而來上。邈歸報以無期。忽被
恩符。參陪計局。籠財權利。但苦于沈迷。貳令辟名。未施于鉤校。俄且記言右史。糾讖中都。拭玉金微之庭。
慎修交勸。握蘭建禮之署。再周序遷。官謗愈譁。績幽自審。方期撲被。庸弊敗材。不謂天誘其衷。人乘所乏。
召詣坐槐之府。趣程視草之工。慕受詔而輒成。第矜拙速。顧每篇而稱善。絕企前修。俟訖程觀。當從報罷。
違荷容明之眷。擢升清切之司。使驛下臨。笥章垂錫。恭惟名器至重。竹素具存。贊內史之出方。遂爲定命。
潤稗誌之謀野。必叩大猷。分押尙書之章。至均政事之食。協華在運。稽古任良。重念拘繫。轡鎖之餘。轉側
風波之後。壯謀奪于多病。惜學廢于長年。旅酬易驚。孤根難殖。責高才而或躋。先下品以奚堪。此蓋伏遇
閣下洞燭人憂。彌綸天律。亮師師之百度。已惠庶工。開穆穆之四門。彌收俊德。曲暢陵阿之化。務安薪樞
之宜。遂俾妄庸。亦膺簡拔。敢不稽參流舛。師式大常。絢裘英之五紵。奮刀鉛之一割。玉芝裁檢。謹敷天下。

之言。絳樂翻階。居愼省中之對。庶申尺寸。仰副陶埴。

景文集卷五十六

啓

回楊舍人啓

比自拜恩。已嘗仲慶。恭以掖居之祕。參福于霄垣。方贊之嚴。慎司于朝冊。號爲凝切。常伋僞良。是以言釋絲繡。暢猷爲于有典。筆含雷雨。演膏潤于多方。果值上才。聿光崇簡。伏惟舍人氣涵先覺。道育至和。薄三代以攀英。泝九流而質要。奏文闕下。嘗被賞于同時。折論書林。弗取資于孟晉。參籌計幕之次。磨墨翠均之餘。常誘乃衷。公符斯議。試言丞相之府。初不淹時。一覽尙方之帷。久之稱善。程篇甫訖。寵渥俄頒。排華路以趨翔。竦儒紳之歆豔。改紆銅綬。分署判花。固已兼謚羽而修詞。接嚴徐而布武。慶雲在上。彌增天采之鮮。瑞鷗來廷。恣覽德輝之茂。適欣顙俊。會枉騰書。緣抒頌于丁辰。厚爲言于推轂。青松云茂。信爲寒日之榮。嘉穀已登。愈重前糠之愧。第銘謙益。徧詫朋方。感懇所叢。奇觚安敍。

回呂舍人啓

伏承茂膺制檢。進直辭垣。伏惟慶慰。恭以舍人貫道幾深。陶天粹美。顧九言而視履。淬百行以保躬。適時重熙。襲慶憑厚。綬華若若。踵仁者而與游。筆語翩翩。追大夫之能賦。早膺試牘。參籍道山。春容大音。汗渙

遐蹤。屬四戶上選。三俊程能。首甄譔次之才。俾草溫純之命。程文旦上。成命暮頽。被芝寶以摛文。旅藥階而布武。綸由絲出。甫光王者之言。羸與經偕。更盛相門之學。得賢爲盛。有道維歡。敢圖謙沖。猥貺題啓。鈇撫塵之舊好。衍推轂之餘詞。糠粃嚴揚。久負先登之愧。松筠茂悅。今同彙進之榮。欣感併銜。精微拙喻。

代回呂舍人啓

近審榮被恩章。進升辭禁。慶儀未展。私忤已深。恭以舍人天稟粹純。道資宏博。飄纓初策。給牘秀科。每沖挹以自安。久盤桓而不進。豫章美幹。茲歷歲以大成。韶樂正音。非至聰之攸舍。果膺試札。入掌命書。矧惟世職之修。尤示朝咨之愜。方且雍容豹式。冠映士林。三代追風。鼓斯文于深厚。十行視草。賁神化于丹青。甫頒得賢。遽煩點翰。敷陳盛美。感慨亨期。顧茲鐘漏之餘。厚齒紳綏之後。雖云閒外。尙克銘藏。

鄭州到任謝兩地啓

伏奉去年四月十九日詔書。還舊職兼龍圖閣學士知鄭州。已于五月二十四日赴任。訖避親辭劇。得可賜藩。大造燭幽。舉宗蒙幸。伏念祁天資拙甚。時事味然。盡信古言。自安素守。數忝帥領。并付便宜。以方有爲之時。責非所習之伎。類難稱職。恩弗汝瑕。擢領計筵。正妨樞省。引訴既苦。成命改班。帖以美資。假之便郡。地雖三輔。靡及于浩穰。人匪獨賢。乃叨于燕息。此蓋開下邁種陰德。推衍上慈。罔俾處于嫌疑。遂遑寧于轉側。敢忘忠敬。歸報坯陶。

謝李太傅惠先令公碑文啓

比者太傅圖昭先烈。仰達奏封。詔大手以抒文。咨健毫而潤石。義均頓首。名煥京阡。裝擗至精。布傳彌廣。僧沁波而不腐。慶貂葉以滋華。謂接襲游。亦詒副本。中復披文之妙。周知濟美之勤。感職所遺。名言罔喻。

陳州到任謝兩地啓

昨奉敕移知本州。卽以今見二十五日到任。盤上訖。收跡遠游。改麾近屏。詔蠲入謝。道便之官。循復寵私。叢并慊愧。伏念祚性惟疏狷。仕偶休嘉。嚮自書林。得持從臺。緣不材而冒祿。召多謗之抵讎。大度掩容。上司保恕。許寬漳濱之疾。遂假淮南之章。幽績殿科。危心疾首。謂應罷斥。翻及采甄。內移六郡之雄。居重四藩之選。府華地奧。物衍歲穰。耀質早衰。顧班春而已強。寒根載茂。寧得地以當然。上本曲成。實緣僉啓。斯蓋閣下敷施陰德。章歛庶官。俾下無失職之嗟。使朝收善善之實。猥容完士。胥洎大鈞。冀自力以及羣。庶有成而論報。析符云恪。翹聞猶賒。徒爾嚮風。恨無飛肉。

謝官啓

昨蒙恩改前件官依舊充職者。歲當大比。秩許稍遷。撫己以思。愧顏無實。竊念祚早以博學。弗逮遠猷。孟軻于事而迂。安仁謂拙而信。託庇材館。竄名道山。向緣一書之奏。已叨三署之擢。且煩申勅。別計累勞。因濫天官之擬。遽陪司寇之屬。不稼胡穡。河干之詠已興。有祿而軒。國人之刺奚弭。諒由褻品。始克進升。斯

蓋閣下封殖危根。青黃斷木。護短無瑕。示訓于師門。兼愛宜廣。期錫于士類。階爲虛稱。誤及榮途。敢不三
陌爾躬。十思乃事。少貪云補。無墜獎憐。巾幘末期。簪履增戀。

謝直館（案）仁宗本紀修內告成在明道
元年十一月祁于此時試直史館

今月十九日。蒙恩充前件職者。祇服言綸。入塵藏室。用浮才表。愧溢情涯。竊念鄙僕。逮無能。倥侗有素。世
微廼仕。天與數奇。甫冠而孤。未堪多難。過時乃學。遂不名家。由鄉老以賓興。參仕途而揚歷。問關吏事。汙
鱗塵容。入陪上計之期。行俟有幽之黜。至今舍垢。善養如春。回備責于最科。俾改升于卿屬。上庠乏使。中
詔甫留。倚席窮年。離經乏效。如天有斗。非取于挹漿。譬馬食肝。敢言于知味。奄銜觀恤。自屏民廩。揭白日
之昭昭。臥清漳而奄奄。縞祥有訖。食息偶存。不謂執政之臣。請問言上。旁呼俊茂。并及妄庸。趣以復官。敦
其給札。義斯干之攸室。括裨海以蒙禱。別寘朝班。人趣會表。逮膺試可。愈慙無文。晨葩竝春。枯楊知其難
豔。天髭同轡。駘步判其先顛。幸得罷歸。以懲妄進。而睿明收采。承弼贊襄。帖紳史之美名。竦羣材之缺望。
揆能隘薄。開命震懸。且古有載言。代爲不訓。聞宣父之歎。猶及闕文。有子長之才。乃稱實錄。國家建明天
載。以賁大猷。招致父英。茂充祕館。磨研編削。盛東觀之游。俱帳餐錢。抗開元之體。罔深道訓。曷宿官成。顧
茲畫餅之名。超據采薪之地。諒緣外獎。方玷榮階。斯蓋伏遇閣下。均愛彙茅。助封芄絳。務英才之樂。有味
其言。極薦寵之私。豫爲之地。假冷風之未力。塗斷木之繁文。密導茂恩。俾加無狀。敢不懋明乃志。慎伏攸

箴。遵道以行。惟書盡信。靈龜自守。潛戒于朵頤。鳴雞有晨。不愆于如晦。庶逃司敗。罔忝知人。

上參政侍郎啓二首

伏蒙執事。以祁叨秩省闕。特賜手筆垂諭。長跪申誦。以榮以惕。竊惟紬次大典。淹久彌年。終篇程御。功先總領。先達樂育。宗工獎成。收錄餘勤。施及無狀。第賞之冊。竄名其間。不稼取禾。奚堪于此。冬曹妙選。誠如來誨。但昔光德舉。官由才重。今承人乏。任與望輕。景行在先。踵武增愧。資材素稟。難乎勉強。姑勵蹇拙。不隸刑書。結庇本根。有望于此。卑情無任佩荷之至。慶幣申況。已具別紙敷敘。謹手啓附還使布謝。不宜。翟邑之別。皎焉華歲。雖寰輔擁驛。宿昔傳達。金玉嗣音。係道實來。然凝素中蘊。未始爲釋者。良以風聲在聽。不如音旨之密也。嚮蒙手教。適會臥病移告。不偕時答。故以爲恨。再得題訊。甫屬有痊。昏瞶涸思。未任牽勉。修謝淹久。政由此耳。矧君侯雅度多可。寧嬰僕以筆牘常儀哉。承贊畫有裕。日休厥問。而獻文在旦。方傾竢于南闕之前。願益自愛。究榮圖而承俊範也。不宣。

回晁參政啓

伏審顯被制榮。恩聯幸政。伏惟慶慰。恭以參政器兩道奧。業總天常。膺旦暮之聖期。踐凝嚴之世職。含光弗照。求福靡回。卓爲高風。飴布輿議。嚮者密銜使指。臨訊軍謀。擁車傳以適勤。會台庭之僉錫。宸心素定。恩策前頒。逮此清明之朝。趣對延登之寵。尙聆秉德。未卽當仁。申雅奏以讓還。枉公函而敷諭。欽惟褒命。

久協朝言。望改素懷。卽符羣望。銜感欣竑。萬一罔宣。

代回宋參政啓

恭惟參政志懷隱正。履尙淹華。契賢運以露才。館懿文而綯國。十行深厚。抗寶訓于楚珩。三接從容。藹詳言于漢席。茂昭公實。克厭辰猷。帝實簡心。邦斯詔德。果近陪于四近。爰闕決于萬幾。僉岳同辭。薦紳動色。尙固謙冲之節。少畱進拜之期。垂況善辭。但欽謙概。竑聆敦勸。式契歡瞻。

回程左丞啓

比者執事茂將明命。近撫輿藩。涓日惟良。班條云始。上風甚樂。聊資造適之宜。河潤有餘。方竑衽幃之賴。敢圖謙損。亟枉誨音。絢邦範之有儀。敷感衿之多緒。永言申誦。敢忘中藏。獻歲方春。趨風未日。慎持齋疾。用副眷懷。

盛右丞問候啓

伏自執事均賢樞筦。改秩臺機。茂選輿藩。聿開尊府。方春臨境。班寬大之詔恩。卽日淪和。又神明之錫祚。欽惟善範。夙係人瞻。雖四國于宣。聊資于邦殿。而六符相比。遲正于乾台。由黃霸之治功。啓平津之封冊。仰祈晏處。務寄粹真。顧舊物之惓惓。遡餘風而叩叩。乃心攸向。點翰匪宜。

上壽州張侍郎啓

恪守魚符。懷懷開。嘗擬中軍之義府。得瞻天老之台華。坐遡三洲。邈成千里。茲者。侍郎緣漢章之代。捐天鉉之崇。敕記室以授辭。付行郵而垂問。大丞相之重。遂屈移書。一逢掖之卑。敢煩鈞禮。餘波沛潤。幽谷蒙暄。諒緣拜賜之階。前啓知歸之地。感慙交集。拙訥難宣。

上內閣侍郎啓

僥焉孤生。庇于大賜。恩紀踰分。年所寢多。均百穀之仰成。殆一天之絕擬。固當時上咫尺之紀。參候門闕之廡。奈何日力中疲。官常外鞅。鏤未成而氣耗。瓶已挈而知空。寢違發藥之言。自取有皮之慢。瞿然內熱。悅爾神馳。恭承鎮靜之餘。允膺方穀之賜。伏惟內閣侍郎。道含崖略。行絕叮咛。據百行之樞。融其素履。御萬物之馬。蹈乎大方。躬易退之一辭。取不回之五福。假息爲樂。寬柔用彊。樹之清風。式是南國。然而侍從之事。固有待于嚴徐。出處之宜。必參行于夷惠。二官圖任。三節行趨。願昭體于當陽。益緣輕于愼夏。奮庸所屬。橫目同歸。傾竢衰衣之來。再望麗帷之末。禱悰兼萃。弱翰匪宣。

賀參政侍郎啓

伏審光奉制書。進知機務。伏惟慶慰。恭以參政侍郎。函德之厚。剛中而明。旅力四方。寅亮丕結。邦被風教。用飭民瞻。天賜耆明。俾輔王室。果咨魁壘之彥。入佐調燮之宜。追鋒疾驅。前席延拜。揭日當午。物無斜陰。推雲崇朝。澤有餘潤。赫蹏行下。薦笏胥歡。祁方守塞防。側聆恩册。振構私喜。調府莫諧。

回泗州知州啓

嚮緣持橐。懇乞爲藩。蒙大度之包荒。俾孤生之從欲。汔茲臥治。正謂藏瘝。敢冀執事推謙下之私。布恩勸之誨。候爰疾走。墨妙前揮。安秋蒞之危懷。露寒松之晚節。靜言銘戢。迺邁等夷。一水通流。六條異守。晤言未日。悃素增勞。

上杭州蔣密諫啓

昨過都之辰。凡五月。始得手教。承以便時止官下。福祚蕃衍。甚休。然音容緬邈。悵悵參積。雖玉音滿紙。瑤華在前。而心府精蘊。疇能宣其一二也。希魯舊得雅望。治績僞聲。出爲方國。翰垣入爲吾僚。景式。舉邇鄉部。遂丐郡麾。然朝須老成。治有連最。雖爾靜勝。恐難滯留。宜專舍沖氣。顯介眉艾。副前席之延拜云。秋暑猶劇。加進常膳。齋杖回。占答不盡萬一。悵悵。

上益州程密學啓

茲若足下。改擁恩節。移總使藩。近職增華。宸眷加等。洒然衆望。協于至公。蓋治績久升。而雅望滋重。是以掩西南之輿。付明哲之才。風行令先。雨浹恩始。想便飾追靡。抗飛旗。徑鉤梯。啓雲幕。則中和袴襦之詠。尅日而至上都矣。但春夏之序。次舍少煩。千萬慎齋。荷集純祉。謹手啓通慶。并詞動止。

上蔡州韓諫議啓

承以盡言觸宰相。出守近州。初聞之。甚駭。俄而釋然。古之人當官而行。亦皆如此。堅車大轡。不能不小。留却而後臻于所趣也。雅懷想以此自慰。但暑熱館次。少爲勞煩。矧素簡上心。當不遠而復。慎護齋疾。

致韓果州啓

官次所限。不克與故人一交臂爲樂。挹挹奈何。殿中趙御史來。稱盛美不容口。以爲治狀爲東川第一。聞之。不勝欣慰。今世龍虎酥酪。舉集足下之門。顧不盛哉。慎調寢饗。以迓來寵。老夫蒙免無他。荷庇不淺。感戢感戢。不宣。

回資政李侍郎啓

茲者執事亟上囊封。願還機柄。伏蒲間請。常寧動容。緣高節以重違。藹朝言而宵仰。容襟申眷。恩數具蕃。進通殿籍之華。升貳天卿之峻。功名弗處。自安利往之常。荃宰相期。彌見親逢之盛。流風所泊。儉俗爲敦。輒冀謙懷。俯貽公翰。味辭條之敷衍。激心術以銘藏。矜式所深。文陳非敘。

代人求薦

周升俊造。美王國之思皇。漢舉賢良。下公車而深詔。所以辨官才于天府。建首善于京師。綈縠具存。簡編可復。驗文王之類。多士以寧。攷班史之辭。得人爲盛。萃茲茂典。屬在昌辰。國家匯璧。沼之清流。紬鴻都之清議。蕩百王之季。肇三代之英。頓天網以該賢。掩珍羣而籲俊。發策三道。許人事而直言。馳傳一封。命計

偕而續食。鳴騶入谷。振鷺充庭。旋屬宣室思賢。金華嚮學。深念舉鄉之制。頗乖責實之文。亟詔方州。精求間傑。苟匪挺橫秋之茂操。秀突弁之瓊姿。擅響天球。聯華序寶。則何以垂光闕里。豫五六而舞雩。搗藻漢廷。冠三千而削牘。必資鴻碩。方協選掄。如某者。牆宇非高。風流素淺。魏人持帚。享徒費于千金。越俗彎弧。近不踰于五步。徒以幼聞令訓。長襲素風。食熊掌以未多。方思慕義。啖牛心而素少。妄冀知名。蹭蹬窮途。流離雅節。入崔公之篋。深愧家人。帶倪掾之經。但期都養。頃歲濫巾。俊乂接武澤宮。勵武城之牛刀。方謀必割。引街亭之師節。遽拜先登。撫昌志以無成。慟良辰而將晚。揚雄素吃。徒自取于扶疎。韓信少貧。分無求于推擇。沈冥散地。游泳太和。蓋內省以甚明。亦歸飛而有素。時或月園追葢。煙驛披文。席絕交之篇。尙思抵几。讀課功之令。幾至廢書。實因感慨之時。頗負飛沖之願。然而東家歷聘。非無載質之勤。馮異責功。未舍收擒之志。普驅驚緩。仰綴翹英。今則充賦匪遙。追錄盡在人言可畏。有同抱玉之家。文士和輕。蓋甚鏤金之數。深惟叢陋。最在孤平。愧居多謗之間。靡有先容之援。陳琳奮藻。況書虎以非工。邢邵干時。恐無風而自落。永言孤藐。宜惻眷憐。閣下俯念頑疎。曲施全度。借一言于華袞。潤九里于靈河。或因筌緒之間。少賜青黃之飾。則要駕之馬。尙千里而可求。失旦之雞。庶一鳴而爲効。發身奮跡。不自他門。卑情無任激切待命之至。

鎮府謝上任與兩府啓

茲者祇循詔旨，惕服官箴，引組揆榮，捫襟擁愧。伏念祔學非企古，知不逮人，向丐冗閒，本藏衰晏，材短多負，志小易安。不圖朝僉誤委邊劇，護師萬衆，綿地六州，遇事得便于宜，勉行輒進其秩，中軍攝總，誠宜卻穀之長年，列將稟承，臣如倪寬之懦武，又況數奇者罕得如志，責實者尤難副名，審計孱疎，交塵受授，所賴下官道包于廣，仁蓋乃疵，拔苗擢以蒙春，穿郤家而引照，鬱爲華寵，庸賁孤生，尙圖軒輊之能，無恩平鐫之誥，州符在手，賓閣馳魂，溯戀所并，鋪宣罔逮。

益州謝兩府啓

昨自定武軍被去年八月詔書，改吏部侍郎，仍知益州，以今年二月二十日到任，訖守邊無狀，易地蒙褒，任非值材，寵實浮願，卽趨治所，祇服褊箴，伏念祔本以屬文，早陪禁籍，後緣學政，稍習吏條，向詣朔郵，臨總師節，辭窮一鄣之守，衆爲寒心，語踰三至之多，每蒙辨謗，戍瓜四熟，領雪徧紛，何圖幽黜之期，更忝驟遷之幸，天卿貳秩，坤絡巨藩，寄任光隆，倫輩歆羨，此蓋閣下財輔不綽，謀熙庶工，含容予取之求，成就汝諧之往，矧蜀歲豐足，益士文柔，法令謹嚴，盜賊衰弭，雖率愚短，可及靖嘉，但身遠者心危，驚禽有以虛墜，援寡則讒勝，楹木爲之先殛，敢丐大鈞，終全一介，班春方始，詣府未辰，榮感所叢，訥澀非敘。

上都運待制啓

伏惟雲章賁宇，待對列于清班，星昴分街，調食歸乎雄部，聿參盛選，允屬兼資，都運待制，閤器雅材，清規

茂識早協邦華之望。洊登書伐之成。簪筆繩達。矢嘉言而罔伏。操籌質籒。衍精計于無垠。克協公僉。遂光禁路。據兩河之會。悉委于均輸。沿八使之名。更資于澄察。適聆來譽。增仰末輝。敢謂謙私。首詒芳問。書藏巾衍。非替卽日之榮。訂況松筠。更識他年之舊。庇陰有所。論感無倪。秋物寢衰。道腴祈勝。見餘馳想。焉足容聲。

上淮寧知府待制啓

協守官經。坐叨廩稍。志衰學落。年長病侵。非無恩紀之隆。絕修書聘之謹。良以道機攸照。容有江湖之忘。夙契所諾。不煩膠漆而合。輒緣至眷。敢擯爨儀。待制允蹈大中。孔甘亮節。危言滿于臺閣。嘉績最于藩維。氓頌轉聞。朝謀僉棄。方且進攜德柄。府眷儒紳。占鈴史以布辭。戒候父而齋況。蔚如翠柏。自凌歲律之寒。愛若青氈。知是君家之舊。內惟刻誦。永誌襄憐。夷道右馳。孤誠南注。願保春塗之祉。助奮天倪之和。傾況于茲。一二非列。

授待制謝兩府啓

比者。被獎中宸。通班祕禁。襃甄匪序。榮灼參懷。竊念祔祜薄早。孤學勤晚就。雖謀千祿。止辦易農。寢簪紱于朝闈。間磨鉛于史室。自忘其鄙。日慎乃修。升直殿螭之均。人簪牢盆之計。車嚴鼓鷄。能無失性之憂。燕麥兔葵。正恨取名之過。漸圖寡悔。少贖空餐。敢冀顯印。曲垂眷逮。因避親于具爾。不緣進于適司。直實邇

聯專由容擢。在人畏假。卽受慙虛。矧茲華閣之嚴。號爲規地之密。字文成葉。羅紉于珍圖。奎勢如鈞。上儀于寶宿。詎應完士。入備王僚。跡夫誤寵之來。抑有爲容之素。此蓋閣下助陵敷育。因墳塋和。謂鳬鶴之異宜。俾鍾盧之參使。遂容昭世。蔑嘆滯才。方且疏淪乃心。靖恭爾位。儼攸箴之所服。戒求福之斯回。庶息煩言。歸酬至鑒。紱巾禱而尙遠。寓筆舌以奚宣。

回密州孫龍圖啓

一昨內閣學士避榮辭禁。就假侯藩。戒東方千騎之嚴。盛顯父百壺之饒。奉將使節。兼過鄉枌。交相如牛酒之懽。驗北海門閭之大。茂遵吉日。臨布寬條。暫厭承明之遊。非勞侍從。莫如韓士之樂。聯便養頤。況敦簡在之懷。難駐斜飛之勢。遡風方切。貽訊見存。賓右座以昭銘。款東雲而增黯。春祺茲始。時養由加。

引卷啓事

談彼上林。雲夢之游蓋寡。觀乎滄海。冰夷之室已卑。況有歷造師閭。上攀雋軌。席陪珍之聘。焜照宸猷。嗣烝汕之賢。彰施國體。誠非間傑。曷竊題評。如祁者。漫漶學疎。迂愚智短。有門邊之翫憐。徒取世譏。乏竈上之掃除。終非時彥。徒以幼專童刻。長預師疊。居體不勤。惟書盡信。探二儀之精奧。採六藝之潤芬。曩以多難亟鍾。先芬永謝。窮愁萬斛。淒入肝脾。故里一廬。鞠爲禾黍。撫箕裘之弗競。瞻丘壑以何歸。藐是諸孤。勉親編削。披覽聖域。刮目翰場。祝揚子之殫蛉。但期速肖。執中黃之賤虎。幾嘆固窮。伏遇國家祗適鴻靈。若

稽奧訓。盡仆威械。專講叡文。三世在天。二宮闡化。坐釐庭而訪道。程夜石以觀書。深詔方州。詳延俊選。公車之府。自嚮者千餘。園橋之門。觀光者萬計。洪惟丕烈。卓冠常均。是使採樵之夫。率談王道。擊轅之鄙。亦次頌聲。獲陶被于餘風。每游揚于素蘊。時或過秦抒論。探穴求書。勞者須歇。登高以賦。孔編顏撻。概覽于舊聞。楚謠漢風。潛推夫餘韻。諒非善著。頗近木強。積是歲年。盈于巾衍。然而壽陵步蹇。殆匍匐以都忘。長沙舞卑。幾迴旋而不足。樸材增散。榆思益賔。率小子之斐然。良華詠嘆。當主人之適爾。合在詆訶。幸遇閣下粹範丁辰。懿文華國。愛兼墨翟。道廣太丘。樹風鑒于往圖。聳人倫之先覺。祁是敢洩汰常累。呈露庸音。綴邦彥之下陳。備貢條之丕式。藻繡聲軌。寧助于采章。唐突璵璠。自知其固陋。伏望鑒茲平進。導以先迷。辨驥坂之長鳴。助沚莪之樂育。因雲洒潤。沛發于餘波。擿埴索塗。俾進于遐武。煦之暖律。激以順風。重念爲文相輕。傳之自古。入門各媚。孰肯爲言。叢爾孤生。最云單跡。抱玉之家甚衆。鑠金之口可虞。敢祈護短之仁。終賜援沉之惠。許鏤鄒之有請。冀豫神兵。爲枯木之先容。將成國器。方塵觀採。彌極怔忡。

上青州相公啓

伏念阻侍台儀。邊殘冬筦。液構戾質。尙廂華光之鑾。蓬曲寸心。時夢翹材之館。惟偃藩之甫爾。介嚮福以咸宜。閣下感會三儀。昭明百度。詳言順采。爲有國之金湯。正色端朝。失羣邪之倚著。勤經大政。辰告遠猷。是以首封蕭何。比之左右手。目送周勃。謂之社稷臣。不績克咸。常均絕擬。頃緣冲遜之雅。重茲勞勩之均。

特開千社之封。聊罷萬樞之柄。訟棠所爰。先梓具存。富貴而歸故鄉。前夸漢牒。股肱之衛元首。終輔舜圖。冀嚮道冲。上符天載。紳綏所詠。坯冶攸依。

兼龍圖謝兩地啓

奉中書劄子。以祁三讓。便令授告敕者。丹訢數聞。成音三卻。願孤易奪。恩重難違。伏念祁年景頽侵。才力衰純。召自西蜀。歸領計廷。蜀有內避之嫌。尤滯官聯之總。蒙便私請。還授故資。仍因進藩。更帖新職。但素願已獲。舊物盡歸。又取美名。實同詭遇。瀝懇雖苦。收渙莫能。惟令出之必行。終降拜而升受。此蓋閣下導仁下濟。俾物曲成。慙多取以非廉。畏罔功之求比。誓勤夙夕。冀報涓分。

景文集卷五十七

碑

復州廣教禪院御書閣碑

〔案〕復州漢竟陵地五代晉時改爲景陵。本傳釋褐爲復州推官。當在天聖三年。碑云乾興元年。意建閣在前。碑文在後耳。

昔者上帝册書藏羣玉四徹之府。神禹祕記。著南方會稽之山。若乃上聖蔚興。含靈皆警。彌文塞天淵之表。遺章倬雲漢之象。溫瑜鏤翰。崇樹規矚。協三五經之制。藥函真本。頒賜方國。鎮七千神靈之封。用能蔽穹壤而相傳。存都邑而有副。鼓之而天下動。舉焉而能事畢。囑囑焚焚而珍圖焜照。在在處處而神物護持者歟。復州者古爲景陵郡。棲地敞夷。殖物繁夥。濱帶江漢。嘗被文王之聲詩。蔽虧宿莽。流爲騷人之悽愴。神姦物厲之不作。民風國教之在柔。居然吉祥。是最殊勝。直城西出一里。有院曰廣教。乃唐禪師積公之經始。大士陸生之攸踐。巧歷之算雖往。故府之求多在。邑井不改。寒泉漱玉而仰流。岸谷相爲。洪流生金而未泐。肇爲寶所。垂乎百禩。觀其面勢盤據。標勝呈露。卻背平野。前瞰大澤。屈到嗜菱之蓀。產幽流不穢。長者揮金而側布。檀施嗣臻。佛事具足以莊嚴。都人讚歎而踴躍。真宗咸平初。遙追來孝。執競先烈。紬禁中茂陵之聚。備天下名山之藏。乃以太宗皇帝御製御書凡百軸下賜焉。照之天光。震動沙界。成鈎之文煥布。辟惡之香紛郁。霧圖蘭葉。蓋天姥之霄窺。赤水珠胎。非象罔而誰得。乾興元年。景陵縣史譚顯

內發信誓。謀就功德。捐緡錢數十萬。建爲重閣。遷賜書而藏之。木摩而匪彫。棟隆而弗撓。鳴磬斯飛以異狀。陽鱗如舞而四承。巍乎覺苑之增雄。凜然天魔之潛衛。奕奕雲構。瞻起威而如在。灝灝宸懿。賜書文之一同。推而上之。思議安及者已。先是天禧中。長人邢公若思。以寶坊雄峙。容篇中錫。非大精進。疇克奉行。乃以僧惠嵩爲傳法住持。并幹院事。未幾。嵩引去。又以今釋長老智昇。次補其位。一滴清淨之流演。普及衆生。四事畢給而薰修。雄成內院。原乎震旦。啓大千之界。皆爲浮土。而積高之。隄或明神之所憑。賢劫示百億之法。待付國王而大事之。緣有諸聖之時現。帝華撫運。筆吾乎五教。而大墳常典。傳歸乎東序之祕寶。宸極繼志。粉澤于先業。而冰綃壺墨。分藏乎不死之福庭。蚩蚩之氓。含甘吮滋。迷帝力之所及。沈沈之宇。子來勿亟。歸天保而在茲。俾是書也。竝日月而麗乎天。斯開也。以香花而散其處。射者不敢西向。如畏共工之臺。從昔未曾得聞。更同如來之藏。祇宿官甫邇。落成斯觀。淳濯至化。頌次成功。銘曰。

寬柔以教。兮南方彊。神明來舍。兮壽而臧。崇建塔廟。兮最吉祥。聰睿撫運。兮臻太寧。雲漢章天。兮奎鉤明。名山大都。兮闕文經。瑤函珠笈。兮敝屣構。拿勒湯盤。兮垂不朽。當來下生。兮齊佛壽。

成都府新建漢文公祠堂碑

蜀之廟食千五百年不絕者。秦李公冰。漢文公翁兩祠而已。冰爲蜀鑿離。培遂悍水以溉。所及常無旱年。西人德之。因言冰身與水怪鬪。怪不勝死。自是江無暴流。蛟蜃怖藏。人恬以生。故侈大房殿。歲擊羊豕。雉

魚伐鼓嘯籥傾數十州之人。人必侍祠。奔走鼓舞。以娛悅神。祝以傳嘏。而後敢安。公之治蜀。開學校。以詩書教人。澡髮故俗。長長少少。親親尊尊。百姓順賴。其後司馬和如。王褒。揚雄。以文書倡。張寬以博聞顯。嚴遵。李仲元。以有道稱。何武八爲三公。漢家號令典章。赫然與三代等。蜀有儒。自公始。班固言之既詳。初。公爲禮殿。以舍孔子及七十二子之象。殿右廡作石室。舍公象于中。晚漢學焚。有守曰高朕。能興完之。後人又作朕象。進偶公室。歲時。長吏率掾屬諸生。奉饌豆饔醪。薦之于前。虔踴謹潔。一再奠而退。辭無敢不信焉。冰以功。公以德。功易見。德難知。故祀雖偕而優狹異焉。嘉祐二年。予知益州。往款公祠。至則區位湫偃。埃蝕垢蒙。不稱所聞。大懼禮益懈忽。神弗臨享。其明年。乃占學官之西。改位鳩工。弗亟弗遲。作堂三楹。張左右序。以獻廡。大抵若干間。布尋以度堂。累常以度庭。疏牕以快顯。壯闕以嚴閉。采有青丹。陛有綴瓦。瓦密棟彊。若棘若飛。乃肖公象于宇間。繪相如等于東西壁。本古學之復。莫若朕。本今學之盛。莫若故樞密直學士蔣公堂。故繪二公于簷漏。皆配祠焉。于是擇日告成于神。揖而升。簾罽果滫肺脩紛羅。而有容。可以告虔。趨而降。壘罇巾洗席燎竝施而不怠。可以盡儀。相者循循。任者舒舒。禮生于嚴廣。靈妥于閭寂。故也。噫。自公之來。蜀之人自視若鄒魯。宋興。名臣鉅公踵相逮于朝。先帝時。巨盜再作亂。弄庫兵。爭劍閣。是時。蜀豪英無一汗賊者。羣頑愁窘。不容喘而滅。非人好忠。家知孝。使然耶。所使然者。不自公歟。傳曰。非此族也。不在祀典。公在之矣。則是祠之作。願白予而古。無俾壞息云。祠之興。同尚之賢。則轉運使趙抃及提

點刑獄使者。凡三人。贊輔之勤。自通判軍州事。祝諡以降。六人。營董之勞。自兵馬都監。毛永保而下。二人。咸書象于西廂。列官里于石陰。銘曰。

公二千石。兮守大邦。冠義義兮。紱斯皇。出有瑞節。兮車騎羅。石室孔卑。兮人謂何。新堂翼兮。耽耽庭廣。直兮序巖巖。吏奉承兮。不譁。神來徙兮。此其家。儼羣賢兮。竝陳。公所教兮。如其仁。庖魚挺兮。俎肉鮮。神來享兮。儋冤延。公教在人兮。無有頗。蜀賢不乏兮。才日多。俗祥順兮。孝慈公。祀百世兮。庸可知。

楊太尉神道碑

慶歷二年春二月甲子詔書。故太子太保致仕贈太尉崇勳。剛純義勇。任重效顯。有不解之亮。能斷之彊。其追諡曰恭毅。中命史臣祁譔文刻石。且俾螭首龜路如令。揭著墓阡。馨香無窮。臣祁伏念天子所以寢禮大臣。隱悼幽顯。霜遷樹拱。猶無已時。沈思念忘。漏入九泉。受名節惠。不使有司得預。雖礪山于廟。固功臣之誓。謹藁在廷。深將帥之思。始終感會。未有二茲者已。敢拜手奉詔。紬繹功狀。掇其功瑑于碑。太尉姓楊氏。字寶臣。系出宏農。支裔熾昌。載質四方。既貫燕薊。世禪武力。曾祖方道。任狹豪邁。仕後唐。高選涿州刺史。合姓寶氏。祖守斌。善射御。以驍騎從太祖。爲龍捷指揮使。授室孫氏。父全美。志勇決。器安重。扈執衛戈。山立雲從。終殿前指揮使。左班都知。委禽王氏。竝涵淳陰德。益久彌大。發越綱緼。歸成後人。公既顯。率禰而上。贈太師中書尙書令。由祖而下。封鄂國公。推妣及曾。分胙楚韓秦。爲夫人國。太尉事兩朝。歷二十

八官。其最著顯者。由彰德軍節度。相州觀察留後。領振武鎮南定武山南東道河陽二城五節度。以留移歷殿前都虞候。侍衛馬軍副都指揮使。以節度爲殿前副指揮使。宣徽南院使。樞密副使。樞密使。再同中書門下平章事。守陳壽毫鎮定五州。兩爲河北兵馬都部署。皆國家腹心柱石。天下所以安危者。故上欲左右有民。惟公之爲。若鼎彝然。所處而重。若金湯然。所特而安。有牙童童。有印疊疊。以勤以庸。元首是毗。舉當世賢臣。魁壘骨鯁之輔。待公而足。公幼時。以門廕事皇太子官。太子訓之學。因通書記刀筆。絕不慕狗馬弋獵事。痛折節比諸生。在左右。謹力自將。未嘗以執何見謝。皇太子卽位。是爲眞宗皇帝。自東班承旨。十一遷爲內客省使。由恩州刺史。三進兼桂州觀察使。公旣落邸雅舊。故敢言。無所回隱。每使四方。督盜賊。采風俗。還奏有條。帝以爲才。其後數訪羣臣。臧否。切問邇言。世祕莫聞。時時有所建明。帝未嘗不稱善。更莅內司。風績流聞。當此時。益親近。出入光寵。同時等輩。皆不敢抗齒。憑几天禧晚年。貴臣投隙。親置黨人。捩禍端。于時公聯掌皇城。密以情告。厚利盜言。或啗或許。公卽計策其詐。念帝久未豫。今上居東宮。若放命竊發。謹動禁省。雖食其肉。奚足償耶。卽日白發其謀。魁慝禽伏。撲燎未然。折蠶始搖。保安宗稷。緊公是力。上自先帝時。旣聞耳矣。及纂嗣。遂以爪牙任之。居中軍上將。風力銳甚。視巖廊整整而度。足和門聲。暨而安。星落幔省。居衛行護。朝廷雄尊。得公愈明。久之。進武樞務。章獻明肅皇后嘗目公謂上曰。是先帝所謂忠孝者。用未及顯。庸有待耶。于是由第四署超正使席。會權綱有歸。政體清明。萬樞叢遠。皆從臨

決公心經大猷。膝造昌言。底行將順。甚稱上意。明年使罷。得視丞相秩。卽淮陽開府。仇家便文誣列。曩冤執事。問之。因以釋憾。有詔罷宰職。公一不自辯。將命之藩。責言靡讎。事久益直。示篋食驢。終蒙簡照。歲餘還治宛丘。北敵丐盟。使者結納。未能得其要領。于時以傳車召公入議。至則贊書已具。若曰。爾復以相守印博陵。如漢灌嬰故事。凡兵在鎮定者。爾皆統之。公頓首陳謝。退條禦戎。擇帥邊鎮。所宜急者數十牘。以聞。謀謨卓詭。乙夜被賞。乘轅北驅。威先令行。化勦爲忤。甲壽馬良。士奮于行。未幾徙常山。今宿帥王相國得用代鎮博陵。與公相犄角。當一面。諸將皆以兵屬。師和帥賢。敵謀益伐。會戎譯講解。兵悉罷屯。詔公入鎮圃田。前此以壯趾之苦。方事未寧。不啻有加。至是固辭不拜。上言。疆場少間。幸得歸節闕下。丐骸骨還丘園。朝議重違。故制授左衛上將軍。聽老明年。冊拜儲保。俸如居官。乃薨。享壽七十。于是歲在大梁閏五月己酉。嗚呼。公以大有之健。中庸之不倚。書之攸好德。出屏入輔。文武是憲。遁居成功。休不待年。其所以經綸黽免者。卷約靈府。完爲和氣。宜艾且祺。屹如岡陵。而遽溢逝。蓋曩之瘁盡與今恬泊不相補歟。或化者自有數。得正而歿。賢所樂歟。此上所以問問鯁傷。臨莅廢朝。錫賙係路。厥哀照室者已。公爲人有崖岸。識詣精明。居常觀圖史。博古今。辯論感慨。森如矛戟。善爲政。摧勒豪彊。苗薊髮櫛。不使敗類。初羣牧制置使。悉雜擇臣領之。所以佐縣官經馬政。獨公由監司至使任。無虛九年。廐校數充。蹏蹏不乘。及在殿衛二府。亦八歲不他遷。勤官善職。見倚于上。乃如是。質所樹立。固宜有大者焉。厭難未萌。先事電發。勇之果也。

華首詣屯。初不辦嚴忠之壯也。蹈道引年。牖下歸全。仁之固也。假令陽秋可作。尙珍且貴。奚止載太常之繆。鏤景鐘之鑠哉。娶夫人王氏。姚氏。田氏。不佞公老。生子十二人。宗讓。宗詡。宗說。宗誨。宗識。宗謹。宗諤。宗誘。宗誼。宗諫。宗詰。讓爲內藏庫使。說內園副使。閑門通事舍人。誨內殿承制。識謹誘竝內殿崇班。諤誼諫詰竝東頭供奉官。詡識諫早世。諸子雖食舊德。皆能以才自顯。于官誅誅也。知公義方。世濟厥岡。烏可量已。薨之年。諸孤旣辭詔葬。則自發私稅。與龜筮謀。得秋八月壬申。克葬于開封府祥符縣鄧公鄉齊公塋之子位。夫難泐者有如石。不朽者有如名。行遠者有如文。且王命焉。顯揚懿烈。由行遠。旌不朽。託難泐。以示方來。則公之系之才之伐之官。何千萬年而有泯焉。銘曰。

范陽張公神道碑銘

士文裕以兵部郎中充龍圖閣直學士。由是累贈公禮部尚書。夫人王氏清源郡太君。葬奉高鄉之黃臺里。尚書之墓。龍圖閣直學士天水趙師民爲之誌。尚書之行。琅邪王彰次之狀。文裕以尚書品得碑神道。焯寵賁幽。乃斲梓石。屬予以辭。予官史官。不得讓。謹按。尚書少明悟。以隱正自將。事親瞿瞿。惟謹。與朋友信。風義崖然。雖服儒衣冠。無腐儒氣。視功名若跬步可取者。太宗時。廷陞間將命。皆欲得雅才。尚書始應選。籍殿前承旨。監冀之衡水稅。舒之羅源茶官。稱職。改換三班奉職。以左班殿直爲環州馬嶺兵馬監押。改左班。選爲淄州兵馬監押。以累免官。權置壽州。俄以三班借職召監大廣治。大中祥符四年夏六月。卒于官。享壽五十六。羅源茶歲入鮮。而置吏專司。尚書身得其處。不敢安。上言。願省冗員。以茶界通判軍州事兼領。詔可。故得馬嶺。馬嶺瀕邊。人皆晝負鞭。夜燒烽。以強力相賢。未嘗知禮義文儒。尚書始與孔子祠。日召惇老可人。語以詩書。曰。習是。可以爲慈父。爲順子。爲悌弟。爲愛兄。遷善革頑。弗犯天子法。衆皆喜。曰。公不鄙我。我不敢從。悉遣子弟學祠下。自是邊俗一變。文人爲刻石。著功在淄也。方咸平初。契丹擾趙魏。乘冰壯。游騎度河。闖齊魯。淄人駭。舉將走山。知州事者乃議縱之。欲身亡去。尚書扈譙園。怒曰。縣官財廩。咸在壕堞。尙完一去。此則強弱凌暴。敵未至。我先敗矣。敵知我有備。敢過而東乎。按劍橫膝曰。有出者斬。知州汗額羞恨。吏欲戰。尙書卽治戰具。浚淺增庫。守氣毅然。後數日。敵去。由淄以東。按堵自若。衆相語。微張公吾等血丹野草。知州儲前憾。陰攘尙書所計爲己功。白于朝。會使者按狀。尙書以實對。吏惶怖。共劾。

尙書妄言。不讎。請下獄。遂連年不能決。尙書訖不自明。故下遷。文正范公仲淹少客滯。知尙書甚詳。常謂今之士欲輩古人者。惟尙書則無愧。慶歷初。經略陝西。至馬嶺。見所謂孔子祠者。咨歎久之。美始興學。并推明責守城事。凡作文數百言。璩之石陰。文正不輕許可人。其實錄自視司馬遷比。故士大夫知尙書忠且賢。益明白不疑。尙書好擊劍射御。推步醫劑。罔不善。賑贍姻宗。弗爲家有亡計也。其訓子。非仁與義弗寘口。授之學。未進。過時爲不飯。已進。乃嘗。故貫之。文裕由膝下日奮勵。至大成。竝擢進士第。貫之性鯁亮。行已峭潔。階級已遷。不肯作沈浮事。年五十餘。宰相薦明經術及所傳楊雄大元。上召見延和殿。問所以準易者。貫之對。雄所言不謬于聖人。又詔撰善作首。其繇獻吉。上喜。翌日。拜天章閣待制兼侍讀。數因占以諷。適筮曰。某事善。今可從。某事不善。今可鑒。上恣聽之。無厭。既退。無半語及省中。故人鮮知者。文裕性沈懿。最能文辭。外和遜。中剛固。弗可屈。名臣鉅公爭從取之。出門下。交章騰辟。寶元慶歷間。西戎僭亂。文裕從大帥經制敵事。調軍與策。彼已尤悉。常爲一府冠。後雖帖職集賢殿。朝廷每以劇任之。自三司判官再爲轉運使。又以至成德軍。領本路兵馬都部署。安撫使。鉗吏姦。療民瘡。摧鹽鐵用度。護西北勁兵處。剖決精敏。無留疑言。儒而材者。文裕爲兼之。其得君。其任重。肆大厥猷。故未艾哉。清源之喪。與貫之跣以送柩。時天寒。趾皸瘃不置。路人皆爲流涕。嗚呼。以尙書卓行健明。不推咎咎人。引利利身。知有子爲之後也。以貫之。文裕。蛻布衣。入金門玉堂。交武在天子左右。知有父爲之先也。此而不銘。尙誰可銘。辭曰。

孰如公之時才不克制孰如公之才不幸而災孰如公之報熾豐厥後孰如公之榮漏寵冥冥揭表于阡鏤美青完請視子孫俾信斯言

張文懿公士遜舊德之碑

惟宋四葉天以端命付皇帝既社南邦乃建元儲始御資善堂參聽天下事眞廟委成羣臣遵審訓奉上國寶皇帝卽位重光合華道益大興天燾地持罔有不承惟其佐曰清河張公由戶部吏部二郎中直昭文館爲壽春及昇府諮議參軍以右諫議大夫歷太子左右庶子進樞密直學士爲賓客以樞密副使給事中領詹事出入兩宮實輔實維逮潛而飛神據景發首狃天極上之六年制詔有司先帝遣朕寶臣曰士遜毗毫厥初勤勞我家外經內幹聲烈嘉飪罔德不酬朕庶幾焉爾惟相且類台德前此公已三遷爲尙書左丞乃以禮部尙書中書門下平章事分執政事筆于是綱紀文章張設修明公與二三臣協恭濟虔風力銳甚因其故而奉行之本其宜而財相之所以鎮浮扼動使安元元之道甚備翁然號稱職相故樞密使曹利用素貴強宗子留鄉里使酒不軌既其獄或謂利用竝坐上疑以問執政衆噤嘿相顧望公徐曰利用大臣宜不知狀獨不肯子爲之時問語先入利用得罪公以議不合罷爲刑部尙書知江寧府宰相文正王會亦爲上別白曹事終曹氏復爵土還所籍產官其子孫居二歲朝京師以檢校太傅領定國軍節度知許州踰年用舊官復人相進中書侍郎兼兵部尙書明年上尊攬萬務除門下侍郎仍前官

遂繼魁柄。未幾以左僕射保留西陲。時楊崇勳亦罷樞密使。以師節兼台司。同謝殿中。班在公右。帝憮然悟。明日授公檢校太師。由南東道節度。以宰相秩復守許昌。公不以漢相尊廢事。爲政有體。不曲折煩苛。時時方略縱舍。有足觀者。賦更在民。類先與期。故所到皆有惠利。仁愛築大隄環城。以障濫潦。瘡積燹完。戶免熱愁。許人蒙休。錢碧頌功。移判河南府。久之。上推雅故。復進公爲上宰。盡還前正丞相府之領。俄封鄧國公。公旣以年高位降。萬或一悔。有不勝任之責。乃七表讓還印綬。而陳又十數。雖上之所以拒而留者。亦不勝記。公執不回。遂冊拜太傅。進封鄧國公。聽謝。特詔朝朔望。大朝會並綴中書門下。班出入施繖。與一子五品緋。賜近城園一區。月給實俸。國朝自中書得老者。以公爲初。辭朔望。惟朝會一再至。至必上眷賜加等。或遣中侍者勞問。嘗御書飛白千歲二字。賜公難老。公因鋪敘前後所錫書九百函。爲歌一篇。賀成盛德。皇祐元年正月己未。薨于第。享年八十有六。翌日。問聞上駭歎。趣外辦車駕。或言曰。直陛下元命不可往。上曰。股肱實虧。日于何避。遂行。哭之慟。賜銀三千兩。布帛醪米副之。以太師中書令賁其柩。進陞宗黨官若職者十有六人。嗚呼。公字順之。淳化中。與鄉進士試禁中。占對鴻微。太宗異之。擢乙科。調隕鄉主簿。射洪令。以異政聞。改襄陽令。外臺自免還。除祕書著作佐郎。知邵武縣。轉本省丞。號略楊億在翰林。高持風鑒。少所器可。薦公才堪御史。因授監察御史。頃江南轉運使闕。中書進擬輒卻。真宗不次用公。執政賀上得人。換廣南東路。三遷至兵部員外郎。代還。授河北轉運使。改工部郎中。河囑棣州。有詔徙

陽信官見糧多不可以遷公視瀕河數州方歉食卽計餘以貸民年如約輸入新郡振乏權贏衆賴以紓眞宗最公治狀欲遂寘左右會王府開面命公曰權選于衆無易而才公拜稽首遂用調護公身七尺進退安重中隱正外文明篤于孝友根于仁愛一時士大夫歆豔成就出門下者皆名流鉅人施予姻舊廩稍略足不問在否幾何任樞省凡八年後三至台輔去位又十年所遇不同而事皆可紀方上諒闇冢司持衡排抵時望陰席權寵公居其間防檢百爲身伴長城慮先元龜妖脂說具無所投汙然而卒定大事蓋乾興時善公之謀章獻佐治軒陞重嚴公事二聖外謀必聞裏言不宣孝承慈佑鴻名雙濟及乾剛獨奮有弗厭者一切罷免而公見留宰相文惠陳堯佐門下生竊出上書妄言變事又有譏諫官立黨者公還奏上前質其誣衊于是告者結三歲刑諫官事寢不下故明道間見公之忠耆德復用上方厲精聽斷公朝夕進見一力匪懈登峻籲良緝興化條太和嘉生蒸薄滲漉舉天下全盛視公所以致君至不至耶大抵相創業者先功相守成者先德經綸之業易言而鎮靖之績難知公可謂治世之傑輔皇極之全懿者已故寶元以來著公之勞公之引年人間事一不概意閱黃老旁行書粗以應外精以治內乘和日化與相頽靡再過鄉上冢召故人長者散金爲壽野服巾車不自貴其貴百祉蕃并化爲康寧偃然牖下如蛻一委當此時搢紳大夫之輩又善公終聖上所以惻怛悼痛舉哀外次三不視朝有司諡爲文懿匪公孰宜凡附官見職者審官審刑二院史館會靈觀判官以近臣兼之契丹國信使在藩房時帝所特選祥

源觀使以宥密領之。集賢殿昭文館二學士、監國子、南郊大禮使、獻懿二太后園陵使、以執政莅之。邑戶萬五千七百。勳階極品。功臣出處更二十六號。公子書史多所汎覽。爲辭章深純典正。尤嗜詩。所得皆自然經奇。無所彫闕。故禮部尙書清河張詠。許爲第一流。生平編次成十集。旣詔索遺藁。家丞錄五集以獻。遂祕禁中。信乎有德而又有言者歟。公之先蓋漢陽王東之苗裔。系牒湮落。世數失傳。至曾大父諱育從。唐本道帥趙凝府鈎校用度。奏爲大理評事。凝破避兵沂漢。止均州鄖鄉道。葬焉。配曰郭氏。大父諱裕。試金吾衛長史。主陰城鹽鐵院。配曰胡氏。父廷朗。隱約違世。配曰趙氏。二龐氏。李氏。公能推恩。以開府儀同三司太師中書令尙書令卨楚韓三國公。上追先烈。以燕晉魏韓魯越國封。自妣而上五族太夫人。公卽魏國所生。七日而母夫人喪。屬公于姑。顧復勞苦。至于成立。公請于朝。封姑爲南陽縣太君。其喪也。如母而不綰。姑子全氏。贈太子左贊善大夫。公娶姓三。蔣黃氏。追封晉陵英國二夫人。馮氏。封舒國夫人。四男子。曰友直。刑部員外郎直史館。曰友僖。殿中丞。曰友正。將作監丞。曰友誼。奉禮部。獨早世。上卹其孤。故友直爲史館修撰。友僖任親民官。友正選大理寺丞。薨之年夏四月癸酉。克葬公于河南府登封縣天中鄉之原。英舒二夫人祔焉。諸子以敍公之業有故吏狀。節公之惠有容官議。冊愍于朝。誌埋于幽。奏終藏事。無不如志。惟絳石巍存。可刻以磨。若又著庸其上。顯摠無窮。誰不謂然。乃請而命史臣祁繫以詞曰。惟天興雨。有雲歆蒸。惟辟撫期。有賢挺生。賢者謂誰。英英令君。竭來于朝。對我聖真。帝啓南社。實護且毗。

旣在東宮。陟降不違。帝受冒珍。瑞福紛綸。負日當天。四海復晨。內經鴻樞。帝心以嘉。三陟宰司。并秉將牙。公之在朝。施設有方。百工儀儀。莫匪駿良。公之出藩。人以阜安。黍稷熾豐。靡厲靡患。固牢歲空。吏不傳爰。老還第家。爲國傅臣。班視台鉉。寵光益振。陶天之和。用克永年。未始疾憂。委化而蟪。帝嘆慙遺。行不便時。殮以衰章。歿軫餘思。凡公猷爲。一代宗臣。有助在史。有德在民。昔周之夷。佐成以功。叶振權綱。王道邛隆。在唐之說。輔明以嗣。擁全威靈。大猷訖濟。公視二臣。孰爲後先。著辭表阡。風烈永傳。

